

أممات في مهمة صعبة

عبير الجمال



ليليت للنشر
والتوزيع

أمهات في مهمة صعبة

٢٢٠٨ / ٢٠١٦ ط١

الترقيم الدولي / ٣- ٩٩ - ٣٥١١ - ٩٧٧ - ٩٧٨

حقوق الطبع محفوظة لدى الناشر

ليليت للنشر والتوزيع

الإشراف العام / إيمان سعيد

مدقق لغوي أ/ محمد فهمي

غلاف / فرنكشتاين

المراسلات : ٢٤ ش سيد درويش

كوم الدكة - إسكندرية

ت : ٠١٢٢٤٢٧٢٣٣٧

: ٠١٠٢٢٦٦١٦٣٢

Dar.lilitte@gmail.com

lilitepublishing@gmail.com

إهداء

إلى زوجي وأولادي.

من منحوني أجمل لحظات حياتي.

من ألهموني فكرة المدونة

وشجعوني على نشرها.

إلى كل من شارك بالتعليق أو الاقتراحات

من الأمهات والأبناء والبنات

المهمة صعبة، ولكنها ممتعة.

د. عبير الجمل

مدرس اللغة الإنجليزية وأدائها

جامعة المنصورة

obseikan.com

تحذير هام

بلاش تصدقوا كل حاجه تسمعوها!!
إوعوا تصدقوا كل حاجه باكتبها!!
طبعا في حاجات حقيقيه حصلت فعلا لي ولأولادي حبابي!!!
بس برضه في شوية "أفوره" من over !!!
على شوية "سرح" من مسرح!!!
" لو كنتوا بتعرفوا إنجليزي أو خيال لو fiction على شوية "فكشنة" من كلمة "
مبتعرفوش!!!
المهم كلنا نضحك ونبسط وبلاش تصدقوا كل حاجه.
وقد أعذر من أنذر.

عبير الجمال

ام المراقبت

الزهايمر

عندى خوف دفين من الزهايمر، ومش عايزاكووا تستغربوا لما أقول لكم إن الخوف ده مع عوامل أخرى، هو اللي خلاني أبدأ المدونة دى.

جزء من عقلى الباطن بيقول "إلحقي دوي كل حكايات الأولاد اللذيذة الصغيرة. إلحقي سجلي كل المشاعر المرتبطة بحاجات يمكن تنسيها مع إنها مهمة جدًّا بالنسبة لك" .. لحظات زى أول مرة أكلت التوأم وجبة صلبة، وازاى تفتفوا علينا كلنا وعلى الكاميرا وبوظوا سجادة الليفنج، أو أول يوم لندا فى المدرسة لما عبد الله أصر يلبس يونيفورم وشنطة ويروح معاها.

رغبة التدوين دى طبعًا زادت لما شفت فيلم عادل إمام.

ولما لقيت نفسى بافتح التلاحة وأقف قدامها ١٠ دقائق وبعدين أأفلها وأمشى علشان مش فاكرة عايزة إيه منها أصلًا!

ولما بدور على مفتاح العربية كل مرة قبل ما انزل، مع إني لازم باكون سايباه فى الشنطه.

ولما باسأل نورا وعلى على ميعاد التمرين مع إن معاده ما اتغيرش من ٣ سنين.

قلت لأ بأه.. ده أنا لازم ألحق نفسى قبل ما أنسى الحاجات اللذيذة بتاعة الحياة اليومية.

ووصيت العيال.

وأدبني بوصي كل القراء كمان، يبقوا يفنكروا لو -لا قدر الله- جالى الزهايمر إنهم
يفتحوا لى المدونة ويفكروني باللى فات لإنه ساعتها هيكون مات بالنسبة لى.
بس هيكون فيه مشكلة صغيرة ساعتها:
إنى مش هابقى فاكرة هى مين عبير الجمل اللى بتمضي تحت المدونة بأم
المراهقين، أو أم مصرية حائرة،
ساعتها بأه ممكن تخلوني أبعت لى إيميل أسألنى: هو إنت مين؟!
عرفتوا ليه دائماً باسيب إيميلي تحت كل بوست؟
اللهم اجعل الحياة زيادة لنا فى كل خير، واجعل الموت راحة لنا من كل شر.

موقعة البجعة

المكان swan lake: شاطئ بحيرة صغيرة في فلوريدا.

الزمان ١٩٩٧

الأشخاص توأم: ولد وبنت ٨ شهور، أخ أكبر ٥ سنوات، أخت ٧ سنوات، وأب وأم.

نورا وعلى قاعدين في عربية التوأم بتاعتهم، نورا قدام وعلى وراها وعمال يشد في شعرها.

- The lake is beautiful

- Yeh

- Mummy, look at the swans! One is kicking one's butt.

وفجأة! قرر عبد الله يحوش عن البجعة اللي بتتضرب، وراح جارى بسرعه في اتجاه البجعة المفترية اللي بتضربها وهو بيصرخ

This is not fair go away you stupid swan

طبعا أنا غيرت اتجاهي أنا كمان علشان أشوف سيادة المحارب هيوصل لحد فين في معركة البجع!

يدوب أنا اديرت أتابع الناشط الصغير في حقوق الحيوان واديت ضهرى للتوأم،
وفجأة سمعت صوت عياط "مكتوم" جاي من عندهم. استغربت لإنهم عادة
عياطهم بيكون حيانى ومفزع.

قلت أكيد على بيمارس هوايته في شد شعر نورا، وهى مش عايزه تسوأ سمعته
بالعياط الصريح؛ فقاعده تزوم بالراحة يمكن يبطل.
وقررت أتابع المشهد السعيد، وعبد الله الجامد بيطارد البجع الشارد لحد ما بنجح
فعالاً في فض الخناقة وإنقاذ البجعة المظلومة، وراجع وهو كله زهو وفخر بالمهمة
العظيمة اللى عملها.

فجأة تانى.

آه والله فجأه!

هما ولادى كده، بيفاجئونا كل ه ثوانى بعمل عجيب، وده اللى مخلينى بأكتب
البلاوى دى كل يوم. فجأة عبد الله جرى ناحيتي وهو بيصرخ تانى:

This is evil, go away you stupid swan. Leave my sister alone .

يا نهار اسود! هو احنا فينا من ماي سيستر؟!

وطبعاً أنا مش عارفه إديرت دايره كامله إزاي علشان ألقى بجعه سودا مفترسه

واقفه قدام عربية التوأم وعماله تاكل في رجل نورا!

طبعاً نورا لذيدة... كانت أصلاً رمت الجزمة والشراب في الشارع أول ما خرجنا

زى عادتها ورجليها الاتنين كانوا مدلدلين من العربية ومللظلين وبيض وفعالاً

يتاكلوا أكل.

والبجعه مش حماره شافت المنظر قالت تدوق.

أتارى نورا يا روحى مرعوبه وموجوعه وخايفه تصرخ للبعجه تاكلها كلها؛ فعماله
تزوم علشان تلفت نظرى وأنا عماله باتابع معركة البجع وسايه بنتى بتتاكل وأنا
مش حاسه!

أمهات آخر زمن!

طبعا لولا شجاعة القائد المغوار عبد الله، اللى انطلق بسرعة الريح فى اتجاه البجع
المعادية وهشها بعيد عن التوأم وفضل يجرى وراها لحد آخر البحيره.
وأنا اضطريت أبعت حد غيرى يجيبه قبل ما يتهور ويموت البجع بصوته الجبار.

Go away you ugly swan or I will kill you!!!

وهكذا أنقذ عبد الله نورا فى موقعة البجع.

القصة دى كلها حقيقيه ومنتصوره عندى على فيديو لو عايزين تشوفوها.

نورا الأمورة

- "إمسكي ده يا ماما"
- "إيه الشوشة دي؟".
- "دليل حصاني، إمسكيه عشان أعرف أنام".
- "طيب هاتى بس إهمدي بأه ونامي".
- أنا عارفه هي عايزه حضني.
هي دي نورا بنوتى.. بس ساعات أحس إنها أمى.
عسوله بجد من وهي صغيره بتستجدي البوسه..
كانت تفضل تحط خدها على بقى عشان أبوسه.
لذيده موت، كانت كلبوظه وحلوه، خدودها طالعين بره شيرين.
ولما حد يسألها إسمك إيه؟ تقول "نورا الأمورة" أنا علمتها تقول كده وهي فعلاً
كده.
طول عمرها بتفرك قبل النوم وتغير مكانها ١٠٠ مره.
مره تمام فى سريري..
ومره على كنبه الليفينج...
ومره لاقيناها نائم على دواسة الحمام! آه والله، وشلتها على سريرها قبل ما حد
يدوس عليها ويفعصها.

دلوقتي بتيجي تمام جنبى علشان تبعد عن أختها "الحبويه" الكبيرة اللي مطفشانا
كلنا من حياتنا.

لكن نوبى ..لذيذه.. وطيبه وحنونه.

بس ديل الحصان برده لسه بيقع من إيدى من كتر ما بتتقلب فى السرير....

وأهي نامت وانا اللي صحيت.

- "اللهمَّ اهدِ قلبى وأرح عينى. آمين".

شعر على هيفضل فى رأس على

يا بني احلق.

لأ.

والله شكلك أحلى وانت حالق.

لأ.

طيب قصره شويه. أنا مش شايفه وشك من الشعر.

لأ.

وفجأه جرس الموبايل:

ألو.

ممکن أکلم مامه على؟

أنا ماماته.. خير مين حضرتك؟

أنا ميس نجوى، مديرة المدرسه.

قلبي وقع فى رجلى.. قلت أكيد على عمل كارته فى المدرسه أو سقط فى كل

المواد.

أنا باکلم حضرتک يا دکتوره علشان شعر على.

خیر!؟

لازم يخلق ... هو ميوظلى المدرسه كلها.

شعر على ميوظ المدرسه؟! إزاي يعنى؟

كل ما أقول لواد إحلق يقولى إشمعنى على؟ لما خلى شكلى وحش قدام كل المدرسين والطلبه.

والله أنا باحاول معاه، بس انتى عارفه دماغ المراهقين، وعمومًا دى حاجه مش خطيره وحريره شخصيه!!

أنا قلت كده ولقيت ميس نجوى انفجرت فى التليفون:

لأ طبعًا مش حريره شخصيه، وبدأت تدبى درس فى الأخلاق الحميده.

والله كنت هعيط وهى بتوضح لى إن شعر على ضد "النظام".

وبدأت تَهْتَف والمدرسين وراها:

لازم نحافظ على النظام.

لازم شعر على ينام.

وفى اليوم ده، قررنا فى مجلس العيله إننا نتبنى شعر على ونزيبه لحد ما يخلع النظام المدرسى العتيق.

القائد على

جاتلى أسئله كثير عن قصة البجع، وناس كثير قالت لي إنتى أصلاً مقعده نورا
قدام وساييه على وراء يشد فى شعرها؟ مش كده حرام؟
بعضهم زودها وقالى: إنت كده أم مفترية ومش بتراعى إن الرجال قوامون على
النساء وحطه الولد ورا وساييه الكلبوظه قدام!
طبعا اللى ما يعرفش يقول عدس، ولا انتم فاهمين أى حاجه، ولا انتم عارفين
على كان بيعمل فينا إيه من وهو فى المهد.
على باشا راجل مقدمام ومغوار ويحب يقود ال stroller طول عمره .
فى الأول كنت بأقعده قدام ونورا وراه، لحد ما بقى عمرهم ست شهور وبدأوا
يتحركوا شويه ويقعدوا ويشدوا فى بعض.
ومره كنا بنعمل shopping فى Wall Mart والدنيا زحمة وأنا ساييه
عبد الله يزق ال stroller بالعيال لإبنى مشغوله بعريية المشتروات.
أول مره لقينا حاجات كثيرة ضاعت من العريية بتاعتهم، يعنى لعب وشخاشيخ
وحزم وشرابات لحد ما تانى مره ظبطنا على وهو بيحدف كل حاجه من العرييه
وإحنا بنزقها ومش واخدين بالننا.
قلنا مش مشكله ويطلنا نسيب لعب جنبهم فى العريية، وكمان بطلنا نلبسهم
حزم وشرابات لإنهم بيقلعوها وعلى بيمارس هواية حدفها فى الشارع أو المول.

لكن المره دى مش زى كل مره، دى ما حتش على رemy لعبه ولا كيس سيريال
ولا برونه من بتوعهم أو فردة جزمة. الموضوع كان أخطر من كده بكثير. كان
موضوع حياة أو موت!

القائد على 2

إحنا في وقت الأوكازيون وطبعًا زحمه، حتى في أمريكا لأنه في J.C. Penny أوكازيون بجد.

أنا مشغوله باختار ألوان ومقاسات للعيال وعبد الله متولى قيادة عريية التوأم وعلى قاعد قدام ونورا بتزوم وراه.

طبعًا اللي بيقعد قدام بيتسلى بالمنظر والناس، ويمكن يشد في الهدوم المتعلقة وكل حاجه. يعنى بيكون مبسوط، واللى بيقعد وراه بيكون شايف يا دوب قفا اللي قدام فلانم يزوم .

ناديت لعبد الله عشان أوريه تى شيرت مرسوم عليه سيمبا و موفاسا من فيلم ديزنى " ذا ليون كينج ". طبعًا أول ماشافه نسي العرييه واللى فيها لأن الشخصيات دى أهم عنده من أمه وأبوه. إخواته إيه بأه.

التي شيرت عجبه جدًا، وأصر يقيسه، وأنا انشغلت معاه لمدة ثانية علشان أشوف المقاس مطبوط ولا لأ.

طبعًا كل ده وإحنا واقفين مكانا وجنبنا ال stroller وفيها العيال.

يادوب عبد الله قلع التي شيرت النحس، وباتدير لقينا العرييه فيها فرد واحد، نورا الكلبوظة قاعده ورا ومذهوله لإنها مش لاقية الراكب اللي قدامها، طبعًا مش عايزه أقولكم أنا صرخت إزاي ولا قلت إيه بالعربي والإنجليزي لحد ما المحل كله إتلم عليا وبدأنا رحله البحث عن الطفل المفقود على باشا.

طبعًا كلنا تخيلنا إن حد شاله من العربية وهرب بيه.
فقرروا قفل جميع الأبواب المؤديه لخارج المحل، وكل الناس بجد كانوا متعاطفين مع
الأم المصريه المجنونه وهى بتصوت على ابنها الضايع.
برده مافيش فايده.

البطل المغوار عبد الله هو اللى حل اللغز؛ لأن الأمريكان كلهم أغيبا، وقعدوا
يدورا فى جميع الاتجاهات وخرجوا ناس بره، يمكن يكون الحرامى خرج بالواد.
لكن عبد الله فاهم إخواته كويس، وراح يدور فى تحت غريبه. نزل على الأرض
وبدأ يمشى على إيده ورجله زى الحبو بتاع إخواته.
طبعًا أنا قلت لا حول ولا قوة إلا بالله، حتى الولد الكبير إتجنن لما أخوه ضاع!!
وتقمص شخصية الطفل وقاعد يجي.

المنقذ عبد الله اللى كان لسه مدافع عن نورا فى موقعة البجع هو برده اللى أنقذ

على فى متاهه J.C.Penny

كل البضاعه مرصوصه على شماعات متعلقه على ستاندات، وطبعًا المحل كبير
جدًا ومليان ستاندات واصله فيها الهدوم لحد الأرض.

طيب ليه عبد الله بيدور تحت كل ستاندا؟

هو مش بيدور على جزمة على أو بيبرونه نورا. هو عارف كويس إن أخوه ممكن
يكون نزل من العربية وبدأ يزحف تحت الهدوم والاساندات.

الفكره العبقريه دى لم تخطر على بال أى حد. أصل إزاي واحد عنده ست

شهور هينزل لوحدة من العربية أصلاً!؟

بس نظرية عبد الله طلعت صح.

ما هو مهندس بالفطره زى ما قلت لكم.

فضل يدور لحد ما لقي على باشا قاعد مستحجي تحت ستاند ومعاه البيرونه الزرقا بتاعته، والشخشيخة البمجي بتاعة نورا، وقاعد ومترستأ بيشرب اللبن ويلعب وآخر مزاج.

Maaaaaaaaaaaaammy,I Found him

Over here come. I found him over here I swear.

أنا انهرت على أقرب كرسي، وبدأت أعيط بجد وبصوت عالي من الفرحة وأنا شايله علوش في إيدي، وماسكه نورا بالإيد الثانيه في العرييه لحسن تهرب هي كمان.

وهكذا أنقد عبد الله أخوه وأخته مرة في J.C Penny ومرة في swam lake ومن يومها واحنا قررنا نفى على في المقعد الخلفي للعرييه، ونورا تقعد قدام لإنها مش هتفكر تهرب زيه وهو ورا بيتسلى بشد شعرها.

obseikan.com

مشروع القراءة للعيال

بلا فخر.

أنا أكثر واحده قرت كتب أطفال في مصر والعالم العربي، قريت كل كتب
وقصص الأطفال بالعربي والإنجليزي.

لأ مش لإني عيله يا قليل الأدب انت وهيّ.

لأن عندي ما شاء الله لا قوة إلا بالله أربع عيال.

وكنت باستمتع معاهم بقصة قبل النوم، وقصة الصبح يوم الأجازة، وساعات

قصة قبل الغدا، وكتاب بعد العشاء، كانوا يفرحوا جداً

كنت متحمسه وعايشه في دور المثقفه، ومتخيله إني لما أقرأ لأولادى وهم

صغيرين باعلمهم يقرأوا وهما كبار.

طبعاً عشم إبليس في الجنه!

هما مين دول اللي هاقروا لما يكبروا!؟

أول ما دخلوا المدرسه واتعلموا القراءه، كرهوا الكتب، وبقوا يتفرجوا على الصور

وبس.. طيب أعمل إيه!؟!

اشترت مجلات ومجلدات مصوره وكوميكس، وكل اللي نفسكوا فيه

ولا حياة لمن تنادى.

هى ليلة الامتحان، ممكن نفتح الكتب الخارجيه وكان الله بالسر عليهم.

إنتو فاكرنى هاستسلم واسيب العيال جهله!؟!

أبدأ ما ابقاش أم المراهقين.
قلت أبدأ مشروع "القراءة للعيال" .. ما هي ماما سوزان يعني مش احسن مني
ولا حاجة.
وإن كانت هي مامتنا كلنا فأنا مامة نورا وعلى.
تخلوا.. نجحت الفكرة.
بدرجة ١٠٠%
هما دلوقتي يبقروا.
وانتم كمان.
يعني مشروع القراءة بتاعى نجح.
ضحكت عليكموا وخليتكموا تقروا.. إنتو وأصحابكموا.
أديكموا بتقروا المدونه بتاعتي!

على وتلامته

إزاي عيل ممكن يبقى حنين كده وتلم للدرجة دى فى نفس الوقت؟!
هو ده على... من صغره غلس.

وهو بيبي كان يزن بداعى وبدون داعى، وكان باباه يزقه فى المرجيحه جامد لحد ما
يتعب وينام.

ويصعب عليها.

أشيله من المرجيحه... يصحى يزن تانى.

طيب كبير وخلاص، كفايه تلامه. لكن لأ، ده على، يعنى وجع دماغ.

وهو ٧-٨ سنين كان يفضل يشد فى دراعى ويقول "حضنه" يعنى حضن.

ولما أديه حضن ما يسيبش دراعى لحد ما اتخانق معاه...

ودقيقه ويرجع تانى، إلا لو كان قاعد على الفيس بوك، لا يعرفنى ولا يعرف
دراعى .

على ولذاته وتلامته أحلى حاجه فى الدنيا. بجد مختلف عن باقى العيال،

ساعات يبقى متعاون جدًّا، يعنى يلملئ الغسيل، ويطلع الزباله، ويرد على

التليفون لما اخواته كلهم يطنشوا، وساعات يبقى زى قلته ومش حاسس بالدنيا

حواليه، وغرقان فى فيسبوك أو بي بي ام

كمان يسأل أسئله مختلفه، خصوصًا عن يوم القيامة والعلامات الكبرى

والصغرى، اللي هو مقتنع إنها قربت، ويمكن تحصل فى ٢٠١٢ .

- "طب ما تصلى بقى من غير ما أفكرك واتخايق معاك على كل فرض. صليت

المغرب؟"

"صليت الصبح، والظهر، والعصر، والمغرب، والعشا، والتراييح، والنوافل، والعيد، والاستخاره، وكل حاجه".

هى دى إجابة على المستفزه كل ما أفكره يصلى، يمكن أنا اللي أم مستفزه؟!!

أكيد، كمان يمكن أكون أنا اللي تلمه، بس علوش هو نور عيوني.

"اللهم أصلح ذريتي واحفظهم، وبارك فيهم وأولاد المسلمين يارب العالمين.

آمين".

وقت الغدا ١

وقت الغدا يا حلوين، يلا ندخل البلكونه ونأكل العصافير وناكل معاهم.
دخلت الكرسيين البلاستيك الصغيرين : واحد لنورا طبعًا بينك واحد لعلى لونه
أزرق - قدام سور البلكونة
بدأنا نلعب مع العصافير، ونرمى عندهم فى القفص شوية لب سورى وهم يقزقزوا
بعدين جه وقت الجدا:
يلا ناكل زيهم. طبعًا بذلت مجهود جبار علشان يرضوا يقعدوا على الكراسى
وياكلوا وهم مدلدين رحليهم من السور الألوميتال المفرغ بتاع بلكونتنا القديمه.
طبعًا أقنعتهم إن عبد الورد زمانه راجع من المدرسه، ولما هيشوف رجولهم
الصغونوه الجميله من تحت هينادى عليهم . هم بيعجبوا عبده جدًّا وممكن يعملوا
أى حاجه هو يقول عليها .
المهم قعدوا وبدأنا نفتح بقنا - الشهير بالمطار، وندخل المعلقه - الشهيره
بالطياره - وبما إن الغدا النهارده مكرونه وناجتس. الحمد لله الطبق خلص بسرعة
البرق. والمفاجأه عايزين تانى.
طيب لو دخلنا كلنا نجيب أكل وهدينا قعدة البلكونه ممكن ما ياكلوش تانى الحل
إيه؟

نزلتهم من الكراسى وطلعت الكراسى بره البلكونه ورحت أجيب المكرونه وأنا مطمئنه. هما لا يمكن يقعوا من السور لإنهم "قرعه" ولا يمكن يفوتوا من الفتحات لإنهم "كلايظ"

بعد ثواني رجعت جرى ومعايا الطبق وفرحانه بالإنجاز بتاع الغدا النهارده، لاقيت نورا واقفه تدور على عبد الله تحت - طبعًا لا يمكن تشوفه لإننا فى الدور التاسع. أما علوش قاعد على الأرض جنب عجلة عبد الله وسأكت ولذيذ ورايق على غير العاده.

معلقه لنورا .. معلقه لعلی ..

يا نهار اسود!! فيه إيه؟ يادوب حطيت المعلقه فى بق نورا ولقيت علوش عامل مصيبه.

صباعه الصغير عامل زى الدوده ومحشور فى جنزير العجله!
الطبق اترمى فى الشارع، مش عارفه نزل على راس مين. وأنا ونورا بدأنا نصوت فى البلكونه. مش عارفه أشد صباعه وأقطعاه ولا أشيله هو والعجله وأروح فىن؟! بكره نكمل الملحمه.

وقت الخدا

الراجل بتاع الخضار اللي في الكشك خد باله، وجرى بعث البواب يشوف إيه الحكاياه عندنا، وجارتنا "رباب" - الله يمسيها بالخير - كانت واقفه في البلكونه ونزلت جرى.

البواب ورباب بيرنوا الجرس وأنا ونورا مذعورين ومتسمرين في البلكونه. طيب نورا صغيره، أنا ليه مش بافتح الباب يمكن حد يساعدني؟ مش عارفه.

وعلى بيصرخ وصباعه ورم وبقي قد البرتقالة - "البرتقالة أم صرة" - بس لونه أزرق.

مش عارفه مين فتح الباب! لأ عارفه...

غالبًا عبد الله كان فعلاً رجع من المدرسه ولقى الشارع كله واقف على باب شقتنا ففتح ودخلهم معاه.

البواب طلب الإسعاف؛ لأن مش هنعرف نشيل على هو والعجله مع بعض نوديههم المستشفى في عربيه عاديه. فجأه رباب اختفت، وفجأه رجعت معاها مفتاح غريب. والله البنت دى مهما قلت لا يمكن أوفي حقها، أجدع من ١٠٠ راجل بجد، فكت الجنزير في ثانيه، واستخرجنا صباع على وهو لسه في إيده!! جرى على المستشفى. الحمد لله جت سليمه، ولسه صباع على في إيده زى الفل

ورجع قد الدوده، بس أنا اللي عقلى ميقاش زى زمان، طبعًا ما أنا أم التوأم
العجيب. كرهت كل البلكونات اللي فى الدنيا، وكرهت كل العجل، بس بحب
على ونورا قوى.
يارب احفظهم وأولاد المسلمين . آمين .

مهندس بالفطرة

كان عنده ٧ سنين، وهما عندهم ٣، وكان مسيطر عليهم تمامًا، يعني يأكل
ياكلوا، ينام يناموا، يقرأ يقرأوا.

يتفرج على the lion king ٥٠٠ مرة يتفرجوا معاه وكان لذيد، بينصب
عليهم ويعمل لهم طيارات ورق من الكرايس القديمه ويبيعهها لهم، وهما ياخذوا
منى الفلوس، وكنت مستعده أذفع آخر مليم معايا، ما دام عبد الله مقدهم جنبه
وملهيين بحاجه مش مضره وساييني في حالي أعمل أى حاجة مفيدة.
لكن تأتى الرياح بما لا تشتهي السفن، وتطلع جارتنا اللي تحت زعلانه ومقهوره؛
علشان العيال بيرموا عليها زياله .

حاولت أستخدم خيالي وأقنعها إن ده ورق فاضى، هما متخيلين إنه طيارات
وصواريخ، ومافيش أى حد قصده يضايقتها.
لكن أبدًا.

كانت ذكيه حبتين، وراسها وألف شاكوش إني باخلى العيال يرموا الزياله عندها.
الله يسامحها، خلتنى دخلت عبد الله والتوأم، وقعدت أنا أعملهم طيارات وباباهم
يدفع تمنها برضه لعبد الله!!!
وعبد الله من يومها حاسس إنه مهندس بالفطره.
وهو فعلاً مهندس بالفطره.

عجلة لكل مواطن

باكره السواقه. بجد نفسى بيقى عندى عربيه بالسواق.

طول ما أنا ماشيه، عربيات تزئق من ورا، وكلاكسات، ومن الجنب ميكروباص بسرعه الصاروخ! وياعينى لما ألقى جنبي وحش مفترس -عربية نقل أو أتوبيس "حبيب مامته" فاكر نفسه عربيه بندقه ويضرب شقالبطات فى طريق النصر ولا الطيران.

ويا سلام بقى لما ألقى ناس بتظهر فجأة وتعدى، ولا كأن فى حد فى الشارع. ربنا يستر، بجد قلبى بيوجعنى من السواقه، وبيوجعنى أكثر مع حرق الدم لما باركب جنب بنتى الكبيره اللي فاكره نفسها "شوماخر" بتفوت فى شوارع القاهره، كأن ما فيش غير اللانسر التعبانه بتاعتها.

حتى عبد الورد، بقى بيسوق بسرعه من يوم ما طلع رخصه، كان هو اللي سايق واحنا رايجين نطلعه الرخصه، وكان سواق مثالى، أخلاق بجد... وأول ما مسك الرخصه فى إيدته، بقى يأمرك ويكسر إشارات، والله العظيم دخل عكسى فى نفس اليوم وإحنا راجعين وأنا قاعده جنبه اصرخ.. ولا حياة لمن تنادى.

طيب إيه الحل فى مرور مصر!؟

إنى أبطل أنا وأولادى نسوق!؟

ولا إنا كلنا - كل المصريين - يركنوا العربيات وينزلوا يمشوا أو يركبوا عجل زى

على...

ياريت.

oboiikan.com

نفوس عميق

إيه التحليلات دى!

كده فجأه، وبعد طول انتظار مسكت القلم وهات ياكتابه وبالعاميه!
ليه يعنى؟! أمال راح فين الإنجليزى والدكتوراه والأدب الأمريكانى و"قلة الأدب"
على رأى محمد....
دائماً لما يلاقينى أقرأ روايه، أو قصه، يقول طبعاً فيها "قلة أدب"... حسن النيه
دائماً متواجد عنده.

طبعاً جوزى وعارفاه كويس.... بس برده لذيذ جداً... أهو بيضحكنى كل فتره
بدل الكآبه اللى بقيت فيها.

حتى لما عملت مدونة وسميتها تحليلات، ماكتبتش فيها ولا كلمه
مش عارفه لأنى مش عارفه أعمل تاينج عربى، ولا لأنى ما عنديش موضوع، ولا
عايزه أكتب بالإنجليزى، ولا مش عايزه حد يقرأ اللى بأكتبه... المهم ماكتبتش
ولا كلمه.

طيب ليه دلوقتى باكتب؟! مش عارفه برده، بس يمكن يكون الوقت ده هو
المناسب لإبنى كنت فعلاً هانفجر لو ما عملتش كده.
حاسه فعلاً أنى باتنفس.

طول الوقت بأبقى كاتمه نفسى... عايزه أخلص حاجه، عايزه أنجز حاجه تانيه،
لسه موصلتش لهدف.

مش هدف سامى يعنى ولا حاجه، بس اى شىء هايف - أو مهم- بأعمله
وعايزه أخلصه وبسرعه.

الأول كنت عايزه أخلص الماجستير، وبعدها ارتاح.

طبعًا ما حصلش؛ لإني لازم آخذ الدكتوراه كمان.

طيب بعدها! برده لسه لازم أبحاث، طيب وبعدين؟

إعاره بقه وشوية فلوس ما يضروش.

طيب أجازة بقه أرتاح من الشغل.

وهى دى الأجازة اللي خلتني أعرف إن العيب مش فى الشغل ولا المسئوليات ولا
العيال.. العيب فيّ أنا.

أنا واحده ما بتعرفش تستمتع بأى إنجاز، ودائمًا بتدور على حاجه تانيه تعملها.

بس خلاص "جزره وقطمها جحش" خلاص بطلت.. حرمت.

هاقف كل يوم آخذ نفس عميق ، قبل ما أكمل وأعرف أنا رايجه فين.

دلوقتي أنا طبعًا رايجه المطبخ علشان ميعاد الغدا!!

أجى أفتح الباب للسوبر ماركت وأخذ منه الفاتوره وفجأه مالاقيش النضاره!
أطلب من عبد الله يشوفهالى فين.
طبعا ده عبد الله، وعمره ما يعرف يدور على حاجه ويلاقيها.
أروح أجرى على نورا أو على؛ علشان يشوفولى الحساب كام؟
طب ليه مش باخلى عبد الله يقرأ الفاتوره؟
مش عارفه ليه دائما أنسى إن عبد الله بيعرف يقرأ!
مع إنه مهندس - ما شاء الله- ويجيد أكثر من لغه.
أكون بره باشتري حاجه وعايظه اشوف مكتوب عليها إيه.
أدور فى شنطتى ألاقيني ناسيه النضاره فى البيت.
ساعات الاقي بنوته حلوه تقرالى وهى بتستعجب إن لسه فى ناس مابتعرفش تقرأ
فى زمن الكمبيوتر!
وساعات اتكسف من نفسي واشتري عمياني، أرجع البيت الاقى الحاجات
صلاحيتهامنتهيه.
أروح رازعه النضاره فى الأرض على أساس إنهما السبب.
أخيراً ولادى قرروا يحطوا حد لمعاناتى وحكاياتي مع نضارة القرابه.
عملولي كذا نضاره.
واحد فى البيت، جنب السرير، علشان لما أقرا قبل النوم.
وواحد على رخامة المطبخ علشان لما افتح الباب لبتوع الدليفري.
والتالته فى شنطتي لما اخرج.
لكن مافيش فايده فيا.

برده كنت باضيعهم.

أخيراً.. عبد الله اشتراي سلسله لكل نضاره علشان اعلقها في رقبتي وما نساهاش
في أى حته.

لما جيت أكتب البوست ده مالقيتش ولا نضاره.

والبيت كله كان بيجرى يدورلي على واحده قبل ما الوحي يهرب.

للأسف! على ما لاقولى نضاره كنت نسيت أنا هاكتب عن إيه!

قلت يلا مش مشكله... خليني أكتب عن نضارة القرايه.

قبل ما تضيع تاني.

قطعة هديل

- هديل بنوتة لذيذة، بتموت في الققط، وهى البنت الوحيدة فى العيلة اللى انتصرت فى صراعها من أجل الققط، وقدرت تحقق حلمها وجابت قطة شيرازى جميلة زيها وسمتها Ritchie لكن تأتى الرياح بما لا تشتهى السفن .
- "إيه تأتى الرياح بما لا تشتهى السفن" دي؟! -
- دى حاجه بنقولها لما نكون عايزين حاجه ويحصل عكسها.
- ترجمي يا ماما، يعنى إيه برده، وإيه علاقة ده بمديل؟
- هديل لما جابت القطة كانت فاكهه إنها هتقضى معاها وقت لذيذ ويتعدوا هما الإثنين على الكنبه قدام التلفزيون يلعبوا سوا فى هدوء ودلع، وخصوصاً إن هدوله نفسها شبه الققط وهاديه بطبيعتها.
- أمال إيه اللى حصل؟! -
- هديل رجعت من المدرسة تانى يوم بعد ما جابت القطة، وفضلت تدور عليها فى البيت كله فى أوضتها، تحت السرير، فى المطبخ، فى الليفينج، أبداً.. فص ملح وداب!
- وفجأه! ظهرت "جنا" القرعه.. أخت هديل الصغيره، شقيه ومفتريه، ومش باينه من الأرض، ويتحرك فى البيت بسرعة الصاروخ المنطلق ومش سايبه حاجه فى مكانها.

طبعًا أكثر واحده بتعاني من جنا فى البيت هى هديل؛ لإنها مش ملاحقة تخجى
الكتب ولّا الهدوم ولّا الجزم بتاعتها من جنا المفترية.

أول ما جنا شافت هديل بتدور على القطة، تطوعت بالمعلومات والمساعدة،
وراحت قايلة بأعلى صوت:

- "أته باع".

- يعنى إيه "أته باع"؟!

- يعنى القطة ضاعت.

طبعًا هديل سمعت الكلمتين دول واتجننت؛ لإنها عرفت إن جنا القرعه عندها
معلومات خطيره عن القطة ومتورطة فى اختفائها أو خنقها، خصوصًا إنهما طول
النهار بتعذب فيها ومسكاها من ديلها بتلعب بيها.

بس هديل قررت تمسك أعصابها وتشيل جنا على حجرها علشان تفهم إيه اللي
حصل للقطة.

جنونه، فىن القطة؟ يلا نجيبها هى فىن؟ جنا طبعًا لثيمة وفاهمة كل حاجه بس
عماله تستعبط لحد ما هديل تطلع كل البونبونى والشكولاته اللي معاها.

وبعد ما كلت الشكولاته، ولزقت الليفينج بالبونبونى، ومسحت إيدها فى شعر
هديل، راحت نازله من على رجل اختها واتجهت إلى المطبخ.

- "قطة باع".

- يا بنتى إرحمىنى، القطة ضاع فىن؟

راحت جنا جاريه ناحية التلاجه وفضلت تتشعبط فى هديل علشان تفتحها.

- يا بنتي مش وقت طفاسه، أنا لسه مدياكي شكولاته وبنبوني.. لكن أبدأ، جنا
فضلت متمصره قدام التلاجه ومصره إن هديل تفتحها.
مفاجأة! أول ما هديل فتحت التلاجه سمعت صوت ضعيف "موا" استغائه.
يا نهارك أسود يا جنا! القطه فين؟! أنا سامعه صوتها في التلاجه بس مش
لاقيها.

جنا القرده راحت فاتحه درج الخضار (لإنه تحت خالص) و Voila...
قطه هديل قاعده ياعيني منكمشه وغلبانة فوق الطماطم والخيار، والظاهر إنها
بقالها كثير متلجه لإنها مش قادرة حتى تخرج من الدرج بعد ما اتفتح.
في اليوم ده هديل قررت تتبرع بالقطه لأي حد من أصحابها معندهاش أخت
صغيرة.

لإنها فعلاً بتحب القطط؛ قررت ترجمها من جنا الشقية!

obekikan.com

حوار الأجيال

- أنا احترت في كلامكو، وما بقيتش فاهمه حاجه، باحاول قد ما أقدر أكون Up to date مع الشباب بس ما فيش فايده، كل يوم كلمه جديده و"الافتكاسات" مش بتخلص.
- أكلم عبد الله مرتين تلاته علشان أفكره يجيب العيش وهو راجع، ولما يرجع من غيره يقولى: "سقطت يا ماما SOrry"
- يا نهار أسود! سقطت في الامتحان ولا إيه؟!
- لأ "سقطت" يا حاجه يعنى نسيت.
- طب ما تقول نسيت وخلاص ولا لازم العذاب.
- ما ينفعش يا حاجه، لازم يبقى في فرق في حوار الأجيال، أيامكوا كنتوا بتنسوا، دلوقتي إحنا "بنسقط".
- طب أيامنا مكناش بنقول لماما يا حاجه إيه رأيك؟
- يا حاجه ده تعظيم ليكى. هو إنتى مش فعلاً حجيتى مرتين؟
- طبغاً حجيت.. بس مش علشان سيادتك تناديني يا حاجه.
- أمال علشان إيه؟
- علشان ... إنت مالك أصلاً.
- أكلمه مرة تانيه لما اتأخر علشان أستعجله، يقولى حاضر يا ماما جاي في الطريق إديني "نصايه".

طبعًا يرجع بعد ساعتين، ولما أسأله إيه اللي أحرك؟ يقول يا ماما أنا قلت لك "نصايه".

- يعني إيه "نصايه" يعني نص ساعه صح؟
- لأ... نص ساعه كانت على أيامكوا ٣٠ دقيقه.
دلوقتي بقت ١٢٠ دقيقه.

أطلب من على يعمل أى حاجه يقول يا ماما "فكك" مني!!
ولما اقول رتبوا أوضكوا باسمعهم يقولوا يبييا ماما دى غاويه "فرهده".
وأول ما بدأت أكتب كانوا بيقولوا بلاش ياماما "تسيحي" لنا on
line "وتسفى" علينا قدام اصحابنا!!
طبعًا فرق الأجيال.

بس على فكره.. أنا مش هأزهق، ومسيرى أعرف كل كلامكوا وحركاتكوا. أنا فعلاً بأعمل قاموس بلغة الشباب وكلها كام سنه وهابقى معاكو ع الخط . ما تحاولوش معايا!!

حوار الأجيال 2

أنا لسه بحاول أثبت لكم إني فاهمه كل ال terminology الشبائي، وممكن أتعامل معاكم من غير أى misunderstanding أو من غير ما "أففش" عليكم . .

عبد الله لما كلمنى من سفارة الرويخ وهو زعلان وقالى إنه (مسحول) و(متخرتا) وشكلهم (فكسوله) فهمت على طول من غير ما حد يترجملى إنه مش عارف ياخذ الفيذا الشنجل بتاعة الدول الإسكندنافية الفاسقة- الكلمة الأخيرة دى بمناسبة انتصار الأخ مرسى بتاع الكرسي، وما لهاش أى دعوه بموضوع ال blog تانى يوم لما راح يكمل (سحل) فى السفاره كلمنى أبعته، email برقم ال ticket فى (السريع المريع) وساعتها برده فهمت لوحدى من غير مساعدة الأخت نورا بنت الحاج محمد فى شرح معانى المفردات الشبائية إنه مستعجل ومزنوق ولازم أبعته email حالاً بالأ. وبعد شويه كلمني وهو "مستكينص" وقاللي الحمد لله "قفشتها"عرفت إنه خلاص خد ال visa وهيسافر بلاد الضلال ويسيبني أنا فى بلاد الدمار -sooty- قصدى بلاد الاستقرار.

على هو كمان عنده مفردات لذيدة.. بس محتاجه ترجمه - خصوصاً لما يكون بيتكلم مع أخته الشهيره بنورا الأموره، واللى مسميه نفسها "المزه" - وبيتوشوشوا ومش عايزين حد يسمع .

زى لما أسألهم - بتتودودوا على مين؟

يقولوا:

- "فكك" يا ماما دول عيال "كتيانه" أو "كبرى" دول عيال "سيسانه".

لو حد فيكو عارف معنى الكلمتين بيعتلى علشان أضيفهم للقاموس

"Words from the Diction of Egyptian Teenagers. اياه:

If you send me words and their meanings I will add your name to the list of acknowledgement.

رغم مصريه، بتحاول تفهم راي حاجه!!

حرب الطماطم (١)

رجعنا من السوبر ماركت محملين بالخيرات، يعنى كيس مليان بنبون وشكولاته ومصاصه وشيبسى والذى منه.

أنا توقعت إن التوأم وعبد الله هيتلهوا فى الكيس ده، على الأقل ساعتين على ما أخلص تصحيح شويه من أوراق الامتحان.

طبعا أيام التصحيح بتكون أيام عصبيه؛ لاني لا أسمح بتواجد القروء - قصى الأطفال - معايا فى نفس الأوضة لإنهم لو دخلوا يبقى عليه العوض فى ورق الامتحان وفى مستقبلى الوظيفى فى الجامعه.

دخلت أصحح وقلت على نفسى وأنا مطمئن وساباهم فى الليفينج بيتفروحوا

على Junk Food - the barny dinosaur - ومعاهم ثروة من

على فكره.. أنا سامعكوا وإنتوا بتقولوا إني أم مستهتره وبعود العيال عادات وحشه. بس هى دى كانت الطريقه الوحيدة إني أشوف شغلى وأنفرد بنفسى لمدة ساعة وأهى مرة كل ترم ما يجراش حاجه.

حسيت إن فى هدوء مريب، وقلت الحمد لله، الظاهر العيال إنهمكوا فى

التليفزيون والحلويات، وقلت أكمل تصحيح.

وفجأة لقيت صوت قرزاز بيتكسر وهم فطسانين من الضحك!

بيعملوا إيه؟!

بكره تعرفوا.

حرب الطماطم [٢٦]

طبعاََ هما خالصوا كل الكيس، وقاموا يدوروا فى المطبخ على باقى المشتروات.
مش هنتخيلوا إيه اللى لفت نظرهم أكثر حاجه!
الطماطم!!

كنا شاريين طماطم للسلطة والظاهر إن الحول خلاهم يفتكروا إن الطماطم
كور و الشيرى توماتو الصغيرة طرازيز وهات يا حدف فى الطماطم بأنواعها لحد
ما خلوا المطبخ بقى كاتشاب، وهدومهم صلصة والأرض بحيرة عصير طماطم.
وخلصوا الليله بكسر قزاز الشباك اللى جابنى على ملى وشى.
ومن اليوم ده وأنا بقيت من أنصار الصلصة، وبطلت أشتري طماطم خالص.
وأكثر من كده.....
أساسًا أنا بطلت تصحيح.
وهأقدم استقالتي واتفرغ لحرب الفواكه.

حملة إقاز العصافير

شعار الحملة:

"إوعى ترمى لبانه على الأرض"

هى دى الحملة الفيسبوكيه اللى توأمى اللذيذ وأصحابهم عايزين يطلقوها علشان
ينقذوا عصافير مصر الغلبانه.

والله حاجه توجع القلب بجد.

حتى عصافير البلد غلبانه ومش لاقيه أكل عدل زى البنى آدمين بالظبط .
على فكره دى مش تريأه ولا تحقير لهدف الحملة.

يعنى لو حضرتك ندغت اللبانه وبعدين يعنى -آسفة فى اللفظ - "تفتيتها" على
الأرض تفتكر إيه اللى هيحصل؟

عصفوره مسكينه عايزه تلقط رزقها، هتقوم نازله بمنقارها الصغير الرهيف على
الوليمة اللى على الأرض- وهى لبانه حضرتك- اللى هى متخيلاها حته عيش.
وقبل ما هى تفتك بالوليمه، الوليمه هى اللى تقضى عليها لإنها هتلتزق المنقارين
فى بعض وتفضل جعانه لحد ما تموت.

يعنى تعذيب يفضى إلى الموت!

ودى فعلاً جريمة شنعاء لا تليق ببلد متحضر زى مصر.

طب آمال أنا زعلانه ليه؟

مِين قال إني زعلانة؟! دا حتى أنا مانعه اللبان فى البيت، مع إن معندناش عصافير

محلقة ولا حاجة!!

بصراحه زعلانه ومقهوره علشان العيال خايفين على العصفوره الأموره الصغيره

اللى فى الشارع، ومش هائمهم البطه الكلبوظه اللى فى البيت.

أى بطه؟

أكيد إنتوا عرفتوها.

أم مصريه مفروسه.

كراكيه نفسيه

عارفين البلكونات وأوض السندره والمخازن والسطوح، اللي مش موجوده فى أى
حته فى العالم غير عندنا فى مصر؟

عارفين لما إحنا بنخزن كل حاجه حتى وهى غير صالحه لأى استخدام على أمل
إن إحنا نحتاجها فى أى وقت؟
الوقت ده عمره ما بيعجى...

تلاقى البلكونه مليانه حلل قديمه، ورجل الكرسى المكسوره من ٢٠ سنه
والبرطمانات الفاضيه اللي كانت الستات زمان بتعمل فيها مربي ومخلل وهتلاقى
فيها كمان كتب دراسيه من لما العيال كانوا فى أولى إبتدائى وكتب التوجيهيه
(الثانويه العامه القديمه). وكتاب التشريح والفسيلوجى بتاع الدكتور لما كان فى
إعدادى طب.

وكتاب الخرسانه بتاع الباشمهندس فى إعدادى هندسه.
حاجات كتير زى دى بنكنها ونسأها، وبنكوم عليها التراب، وتجب حشرات
وبلاوى، وبرده مصرين نحتفظ بيها لحسن فى يوم نحتاجها.
ليه إحنا بنعمل كده؟!!

ليه العيال الصغيره ما بتراضاش تتخلص من اللعب المكسره والعرايس اللي من
غير راس ولا رجل؟! ...

وليه الستات بتحتفظ بجزم العيال القديمه أو لبسهم اللي ما بقاش موضه من أيام
الستينيات؟!

ليه؟

ببساطه... لإن الحاجات دى بتحسنا بالأمان.

الحاجات دى بتكون مرتبطه فى ذهننا بذكريات حلوه أو مره، بشخص عزيز ما
بقاش موجود أو بحاله معينه مش قادرين نوصل لها دلوقتى.

جزء من تكويننا النفسى بيقول إننا لو اتحلينا عن الكراكيب المكومه فى البلكونه
هنكون فى نفس الوقت بنتخلص من الذكريات الجميله، أو اللحظات الممتعه، أو
حتى الأشخاص الغاليين علينا. مع إن ده طبعًا ليس له علاقه بالحقيقه.

بالعكس.. ده إحنا لما بنتخلص منها بنوسع مكان مش بس فى البلكونه أو
السطوح أو السندره، لأ ده كمان فى نفوسنا وقلوبنا لحاجات جديده، من غير
أى تراكمات للماضى.

سامعه طنط بثينه بتقولى:

- طب وإيه يعنى الضرر لو سبت كل حاجه زى ما هى فى البلكونه وجبت
حاجات جديده كمان؟ ولا هما يعنى شوية كتب علم النفس بتاعتك لازم
تطلعها علينا؟

- لأ يا طنط ... ما ينفعش تجيبى حاجات جديده قبل ما ترمى كراكيبك اللي
فى البلكونه أو تبعيتها لحد يستفيد منها.

- ليه يا ست الفيلسوفه؟

-أولاً: لأنها بتطلع عينك كل أسبوع في التنظيف وتعدى تغطيها بملايه قديمه وتشوهى منظر البلكونه.

ثانياً: لأن الحاجات الجديده برده مصيرها للبلكونه، وبعد كام سنه مش هتلاقى حتته تعدى فيها.

طبعاً يا طنط أنا بجزر معاكى.. مش قصدى خالص الكراكيب فى حد ذاتها.. مع إنها لازم برده نخلص منها.. أنا قصدى الكراكيب اللى جوانا.

عارفه لما يكون فى أوضه منعكشه وكل حاجه مش محطوطه فى مكانها؟
يعنى الشلت متكومه على كنبه واحده، وطبق قشر اللب مدلوق على الأرض،
وجرنال السنه اللى قبل اللى فاتت مفتوح على الكرسي المدهب، ولبه الأباحوره
اللى اتحرقت لسه ما حدش رماها وحط غيرها؟

إيه رأيك فى المنظر ده؟

- منظر الزباله - ولا مؤاخذه- الست اللى بيتها كده تبقى عفشه.

- أهو إحنا بنبقى برده عاملين كده من جوه لما نصر نخزن كل حاجه جوانا.

يعنى نفضل نفكر نفسنا بيوم الخناقه مع طنط ناديه على بلاج مرسى مطروح سنه

١٩٧٠ وإزاي الواد خالد إنها - قليل الأدب اللى مترباش - حدف الرمل فى

عين وشعر بنت عمته ساميه، والبنت اتقهرت من العياط، وامتها طلعت عينها

على ما نضفت الرمل من شعرها.

ونفضل نحكى ونتحاكى على الموضوع لحد ما طنط ناديه تقطع علاقتها بطنط

ساميه، وكل واحده تحرض جوزها على جوز التانيه.

هى دى الكراكيب النفسيه اللى لازم نتخلص منها وبسرعه ونستغل الأعياد
علشان نصالح اللى خاصمناهم ونسامح وننسى كل الأسيه بتاعة زمان.
إرمى ورا ضهرك كل حاجه.

وافتكرى بس إن الدنيا قصيره، وإن ممكن العيد ده يكون آخر عيد لأى حد فينا
-لا قدر الله-.

لازم ننظف جوانا زى تنضيفه العيد بتاعة نينه زمان، ولما كانت بتغسل
السجاجيد والحيطان والستائر والأبواب وسلم العمارة علشان كل حاجه تعيد
وهى نظيفه.

بذمتكوا إيه الأولى ينظف على العيد الكراكيب اللى جوه ولأ اللى بره؟
مستنيه رأيكوا وكل سنه وأنتم بألف خير.

الهدهد

تصوروا هدهد جميل في أحد شوارع القاهرة العامرة وقت الظهيرة المكفهرة!
المدهد- للأجيال الجديدة المحرومة من جمال الطبيعة- لا يمكن يعيش في الزحام
ويشعر بالأمان فقط في وسط الحقول الكبيرة أو الحدائق الغناء.
المدهد بجماله ورشاقتة (فعالاً على راسه ريشه بين الطيور الثانية) خلاني كنت
هاعمل حادثه لما شففته في الشارع .
ماكنتش مصدقه عيوني إن الطائر الأنيق ده لسه عايش.. وفيين؟ في مدينة نصر!
كنت هالبس في العريه اللي قدامي وأنا بمحاول أتأكد إنه هو فعالاً هدهد ومش
تخاريف سواقه.
لولا الملامه والكلاكسات اللي سرعتني كنت ركنت ونزلت علشان أتأكد.
ومن يومها وأنا بأتعمد أمشي في نفس الشارع لحد ما شففته تاني.. وتالت..
وهافضل أمشي هناك على طول.
بس مش هأقول هو أى شارع علشان مايتحولش لمزار سياحي ويفضل بتاعى
لوحدى.
أنانية... صح؟
ورومانسيه عبيطه.. بس فعالاً حاجات بسيطه زى كده ممكن تنقلك من مود
للتاني في لمح البصر .

يعنى تبقى فى شارع مزعج وعربيات عماله تزنق وتكلكس والدنيا حر ونفسك
توصل بأى شكل.

وفجأة كائن جميل يظهر قدامك يخليك تنسى كل الزحمة والحرق والغم وتاخذ
هدنه إجبارى فى أحضان الطبيعه.
شكراً ياهدهد، ورنما يكثر من أمثالك فى كل الشوارع؛ عشان ناخذ جرعة بوجهه
على الماشى!

Sweet little things CAN still happen

دولاب الحكايات (1)

دولاب الحكايات! إيه العنوان الغريب ده؟!

حتى انتى يا ماما بقيتى بتعرفى تفتكسى؟

إحنا نعرف دولاب الهدوم، ودولاب الملايات، لكن إيه يعنى دولاب الحكايات بتاعك ده؟!

لا يا حلوين، إنتى وهو، ده دولاب الحكايات بتاعكوا إنتم، مش بتاعى أنا ولآ نسيتموا؟

طبعاً نورا وعلى مش ممكن يكونوا فاكرين الوقائع الخطيرة بتاعة الدولاب الكبير بتاعى؛ لإنهم كانوا سنتين تلاته لما عملوا عملتهم السودا.

كنا قاعدين أنا وهما فى أوضتى، هما الإيتين قاعدين على الأرض وييلعبوا ميكانوا على بارى وعمالين بينوا بيوت ويهدوها ويعيشوا فيها عرايس نورا وعبالها الكثير، وساعات يعيشوا فيها حيوانات الغابة وال ZOO بتاع على. كل ده وأنا منهمكه فى الصيفى والشتوى وعماله أرتب الدولاب.

خلصت درفة الملايات وقفلتها، وبدأت أرتب درفة التعليق، يعنى أشيل اللبس الصيفى الخفيف، وأنزل لبس الشتا الثقيل.

طبعاً أنا طويله حبتين؛ علشان كده دائماً بأستعين بصديق عزيز فى ترتيب البلاكار كل صيف وشتا، ألا وهو "سلم المطبخ" وأفضل طالعه نازله أطلع اللبس اللى خلصنا استعماله فى البلاكار من فوق وأنزل اللبس بتاع الموسم الجديد تحت.

طبعمًا منظر الأوضه ييقى تحفه: لبس على السرير جاهز للتعليق فى الدولاب، ولبس على الأرض جاهز للتبرع؛ لأنه صغر على العيال؛ وأكوام غسيل فى الناحيه الثانيه، يعنى ييقى يوم ممتع لدرجة الغم.

كل ده والتوأم اللذيذ قاعدين جنبى ينزلوا اللى على السرير على الأرض، ويطلعوا الهدوم اللى عايزه تتغسل فى الدولاب وهلم جزًا.

لما الجرس رن، رحت أفتح الباب للواد عبد الرحمن، صبي المكوجى بسرعه. بسرعه؛ لإن سيادته بيزعل مننا لو تأخرنا فى فتح الباب، وساعات بيعاقبنا كام يوم ويجرمنا من خدماته، وآخر مره كان مدينى تحذير إنجليزى، وقايلى على فكره أنا مش جاي تانى لو لطعتونى على الباب زى إمبراح. على أساس إنى بتأخر على سيادته بمزاجى؛ ما هو مش عارف أنا باتعامل مع مين طول النهار، إثنين غسل عايزين مراقبة ٢٤ ساعة كل يوم، وجاهزين لعمل الكوارث على مدار الساعه.

المهم رحت أفتح لعبد الرحمن وأخذ منه الهدوم المكويه وأحاسبه وأديله الهدوم المغسوله، وبالمره يقعد ييستف فىا شويه علشان فتح الباب المتأخر، طبعمًا ده حد وقت، وبما إنى غبت عن عيون التوأم الحلوين حوالى كام دقيقه، كان لازم أرجع الألقى كارته - زى العاده-.

هى إيه؟

مصرين تعرفوا؟

طيب تعالوا بكره وأنا أقول لكم كل حاجه.

دولاب الحكايات [2]

يدوب رجعت الأوضه بالهدوم المكوية على الشماعات، ولقيت العيال اختفوا هم
الاتنين! آه والله العظيم الملمش أثر في أوضتى!
رميت الهدوم على السرير وجريت أشوفهم فين!
فص ملح وداب.

على بخ.

ونورا بخ.

إنتوا متخيلين أم ممكن يحصل لها إيه لو تاه منها عيل واحد؟! أنا بقى تاه منى
اتنين فى نفس ذات اللحظه وفيين؟ فى نفس ذات البيت.

أم عبقرية صح؟

أول حاجه، فتحت باب الشقه ليكونوا خرجوا وانا بكلم عبد الرحمن، ماها كانوا
لسه قرعه ومش باينين من الأرض.

الواد عبد الرحمن كان لسه واقف ير جرس الجيران بافتراه؛ لأنهم لسه مافتحوش.
(الظاهر إنه متعقد من العماره كلها مش احنا بس).

- شفت نورا وعلى يا عبد الرحمن؟ هما خرجوا قدامك لما رحى أجبى الفلوس؟
الواد بصلى من فوق لتحت وماردش عليا!!

طبعا أنا عارفه إنه كان بيعسبن عليا ويقول: والله الست دى مجنونه أكيد.

قفلت الباب وقلت يمكن يكونوا دخلوا البلكونه يحدفوا شويه هدوم ولأ حاجه.

طبعًا لأ؛ لإني كنت اتعلمت من عمالهم القديمه وبقيت أقفل البلكونه بالقفل.

يا نهار اسود انتوا فين يا عيال؟!

يا على، يا علوش إنت فين؟

تعالى خد lollipop وشييسى

يا نورا يا أموره ردى على مامى.

تعالوا خدوا شكولا و"بنون" على رأى عمو شفيق.

ولا حياة لمن تنادى، مش موجودين فى أوضتهم، ولا فى الليفنج ولا أى حته.

قلت أرجع أدور فى الهدوم اللى على الأرض، أو اللى على السرير لحسن

يكونوا بيلعبوا "هايد آن سيك" تحت الأنقاض.

برده لأ.. مش تحت الهدوم ومش بيردوا عليا.

ياترى كانوا فين؟

لو حد فيكوا عرف يخمن يبقى هو أذكى القراء وهاكتب له بكره blog

شكر وتقدير

ويمكن أتهور وأديه هدية.

مستنيه ردكوا وتحميناتكوا على e-mail

abeerxx66@yahoo.com

دولاب الحكايات (3)

طبعًا جاتلى إجابات كتيره جدًا.

واحد ذكى ونييه جدًا قالى إن أكيد نورا وعلى كانوا انخطفوا.

والتانى قال: أكيد يا طنط إنت "بتحورى" علينا (مؤدب جدًا).

والتالث أذكى إحواته قال: طبعًا كل القصة دى خياليه؛ لأن لو ده حصل كان

إنت ممكن تروحي فيها. وكان زماننا مرتاحين من الـ blog بتاعتك. (مؤدب

جدًا جدًا جدًا)

طبعًا كلكوا غلب حماركوا لكن أنا لا.

بما إن كان عندى سوابق كتير من اختفاء أحد التوأم، مره فى التلاجه، ومره فى

فرن البتوجاز، رحى أفتح كل حاجه مقفوله فى البيت لحد ما لقيتهم.

يعنى فتحت دواليب المطبخ.

ودواليب الحمام.

والتلاجه والغساله والمجفف.

وأخر حاجه توقعتها كان نفس ذات الدولاب اللى كنت واقفه من الصبح

بارتب فيه! هو ده!

our friend Dina was the only one who guessed right and i
thank her very much.

الإثنين الحلوين كانوا قاعدين جوه دولاب التعليق، وبما إن الهدوم كانت طويله

وواصله لأرضية الدولاب، كانوا مش باينين.

السؤال اللى محيرنى لحد دلوقتى، هم ازاي قعدوا المده دى من غير أى صوت مع
إنى دائماً بأفضل إنى أسكتهم لمدة دقيقه فى اليوم؟!!

بكره!

بكره الولاد يكبروا وارتاح.

بكره أخلص الدكتوراه وأعيش.

بكره تخلص الإعارة ورتاح.

بكره يتخرجوا من الجامعة ونبطل قلق، بكره يتحوزا ويستقلوا.

بكره! بكره! بكره!

كل حاجه بكره.....

طيب إيه أخبار النهارده؟ ليه النهارده على طول مش مهم؟

كأنه مرحله متوسطه لازم تخلص وتخلص بأى شكل وأنا تعبانه وعيانه وزهقانه
وقرفانه.

ليه النهارده مايكونش فيه بهجه؟ مش هأقول سعادته علشان دى كلمه كبيره
قوى ولا حتى بكره.

لازم كل يوم يكون فيه حاجه مبهجه ولو من نوع بسيط ..
يعنى لحظه استمتاع بضحكته من القلب.

أو مكالمه صديقه خفيفة الظل، أو حتى كباية شاي بمزاج.
زى الأجنب، يعنى لازم نفصل.

أنا طول عمري زى القطر مابعرفش أفضل، وبأخذ فى وشى لحد المحطه، وبعد
المحطه مابقفش آخذ نفس، وأجرى على المحطه اللى بعدها.

والله حتى وأنا عيله، كنت بذاكر زى الحماره، لحد لما بابا يجي ويقولى لازم تنامى.
هى طبيعة شخصيتى، بس مش قادره أكمل كده.

أدينى واخده أحازه، والمفروض إني قاعده فى البيت مروقه والحمد لله، عامله
إنجازات فى حياتى وحياة عيلتى مش بطالة أبداً، بس ليه مش عارفه أستمتع
بالوقت ده اللى مفروض يكون لذيد وبدون أعباء!
نفسى أحس بالراحه الحقيقيه وأستمع بوقتى وأنا فاضيه.

طيب ما أنا عمرى ما باكون فاضيه، دائماً باعمل حاجة مع العيال، فى البيت أو
حتى فى دماغى اللى عايزه كسرهما. هى دى الطريقة الوحيدة علشان أفصل،
نفسى ما أحملش المهم ولا استنى بكره عشان أعيش. سامعه

بلاش نستنى بكره لما أحوال مصر تستقر، خلىنا نحاول نعيش النهاردة ونسيب
بكره على الله، ما دام بنعمل اللى علينا بص حواليك فى مصر وانت تعرف.

"اللهم إني أعوذ بك من الهم والحزن".

"اللهم إني أعوذ بك من الجبن والبخل".

"اللهم إني أعوذ بك من العجز والكسل".

"اللهم إني أعوذ بك من غلبة الدين وقهر الرجال".

جنان الماركات

- "عاوزه، عاوز، هاتيلي، إشتريلى، لسه ما جبتش" هى دى مفردات حياتى مع العيال كلهم، خصوصًا التوأم العجيب ربا وسكينة. لأ طبعًا، دول ولد وبنت، بس مش لاقيه لهم إسم حركى مناسب.
- عايزه مضرب زى بتاع نادال ماركة "بابولا"
- "نعم ليه؟ هو انت رايحه Wimbledon؟"
- "و هاشترى "فيريشن" جديد كمان علشان ضاع منى فى الملعب".
- "هو كل مره يضيع؟ إنتى مش بتدورى عليه ليه وتركيه تانى؟".
- "يا ماما ده بتاع ب ١٣ حنيه إيه يعنى؟".
- "كل مره يقع؟ طب وبعدين؟".
- "هاتيلي شويه خليه فى البيت. لازم أغير الجراب بتاع المضرب المره اللى فاتت الكابتن قالى هأقلبك الجراب القديم، ما هو لسه شغال لازم توفروا، يعنى لسه معايا الجراب البينك القلم".
- يا فرحتى! طب ما تسمعي كلام الكابتن وتوفرى فى كل حاجه".
- طبعًا أنا بأتكلم مع نفسى؛ لأن هى مش بتسمع، هى تطلب ويس.
- "شنطة التنس اللى عجبت على موجوده فى محل فى "سي تي ستارز" وهو هيموت عليها... لازم تجيبها له. يا ماما دى حاجه هايفة".

- هو إنتى الحامى بتاعه... ما هو بيقول هو عاوز إيه."
- هو قالى إنه عاوزها دلوقتى وعليها "سيل" كمان.
- هو ده نمط كلامنا أنا والتوأم اللذيذ، كل يوم نصحى "العصر" نشوف حاجة تكون "ماركه" علشان نعوز نشترىها، وهى دائماً تدافع عن اختياراته، وترن على الحاجات اللى هو عاوزها.
- من صغرها كانت تدافع عنه فى الحضانه والمدرسه، والتدل كان بيسيب لها شنطته علشان تشيلها له لحد البيت.
- كبرت البنوته بقت ١٤ سنه غسل ولذيذة وآخر رخامه. الزن لعبتها المفضله ويجرب بيت النت على الماركات....
- كل حاجه جديده عاوزها ، وياريت تكون بينك بس لو مش متوفره فى مصر ممكن تتنازل وتجب لون تانى.
- بعد محاولات مضنيه إننا نشترىها من على النت، طبعاً كل المحاولات باءت بالفشل؛ لإننا إتجنب علينا قبل كده من اللذوذة الكبيره اللى بقالها سنين بتطلب "البن العصفور" من النت وغيره.
- بطلنا نشترى من النت، وقريناً جداً هنبطل نشترى من المحلات؛ لسوء الأحوال الاقتصادية فى بيتنا العامر بالطلبات المستعجله.
- وربنا يجعله عامر!!
- أم المراهقين، مش أم المصريين.

نظارة أم شريف

إيه ده، هو انتى غيرتى الشغاله؟

أمال فىن "عواطتشف؟" كل يوم تجبلنا واحده جديده؟

لو انتى محترمه وبتساعدبنى كنت ماجبتش حد . أنا مش غاويه شغالات وطول
عمرى باشتغل بإيدى لحد ما اتهديت .

طيب دى ماتدخلش الأوضه عندى، إحنا لسه مش عارفينها، وأخاف تاخذ
حاجه .

لا ماتخافيش، هى أصلاً مش بتشوف ويدوب بتحسس .
برده ما تدخلش عندى .

طراااااخ

صوت أطباق بتدشدهش، وكبايات بتطير؛ لإن أم شريف مش شايفه إن العباقره
ولادى سايين أطباق وكبايات وحلل على كل ترايبزه فى الليفينج . هى ماشيه
تنفض بقوطه، ومالهاش دعوه إيه بيقع .

لأ مش نافع كده يا ام شريف، لازم نروح نكشف نظر ونعمل نضاره حلوه زيك .
ربنا يخليكى يا دكتور، دا أنا نظرى ضاع خالص، وعمر ما حد قالى إعملى
نضاره، هو بعد ما شاب ودوه الكتاب؟

ولا شاب ولا حاحه، ده إنتى آخر شباب، المهم استمرت المفاوضات مع أم شريف أسبوع لحد ما رضيت تروح لدكتور العيون، وجابتلى الكشف علشان نعملها النضاره.

ماشاء الله اليمين - ١٤

والشمال - ١٢

حاجه فله جدًا، أنا مش عارفه هى أصلاً كانت ماشيه ازاي! وازاي بتلاقى الميكروباص اللي يروحها بيتهم؟! عملنا نضاره جميله، طبعًا شمير مخصوص، وعدسات مضغوطه، وجراب زى العسل.

وكلنا فرحانين إنها أخيرًا هتشوف الدنيا بمبى.

أنا ونورا بنتخانق مين فينا نعملها المفاجأه وتديها النضاره.

طبعًا أنا انتصرت، وياريتنى كنت خلّيت حد غيرى يديها لأم شريف علشان ما إتفرسش.

حلوه عليكى النضاره يا ام شريف مبروك.

شكرًا يا دكتور.

بلاش تقلعيها خالص علشان تحافظى على عنيكى.

حاضر.

داخله المطبخ بعد ٥ دقائق، لاقيه النضاره مرميه على طرف البتوجاز. عادى

خالص.

إيه يا ام شريف قلعتيها ليه؟

أصلها واسعه عليه.

طيب أنا هارجعها لبتاع النضارات يضيقتها، وتيجى معايا يظبطها على وشك.
المهم سحبت أم شريف ورحنا "جاجوار" محل النضارات، وهناك عينها زاغت
على شمير تانى، قلت مش مشكله، المهم تلبسها وتكون عجاها.
عملنا النضارة التانيه.

جميله وزى الفل، ولا بسه على وشك صح يا ستى؟
أيوه والله يا دكتوره تسلم إيدك.

تانى يوم بافتحلها الباب، كنت هاقع من طولى، فين النضاره يا ام شريف؟
معايا إهه يا دكتوره.
طب مش لا بسها ليه؟

أصل أحويا قالى متعوديش نفسك عليها.

وهو أخوكى دكتور عيون يا ست إنتى؟

لا مش دكتور، بس نظره ضعيف طول عمره، وماشى زى الفل من غير نضاره!!
إرحمىنى أنا مش ناقصاكى يا ام شريف.

عبقرية عواطفتشف

الله يمسيكى بالخير يا عواطفتشف، كانت غير أم شريف خالص.
كانت بتشتغل وهى لابسه عدسات ملونه، بتقول عليها لمز يعنى "lenses" لو
بتعرفوا إنجليزى وعمرها ما كسرت كباية او طبق
هى يا دوب خلعت باب الميكرويف مره.
وقطعت خرطوم المكنسه مره تانيه.
وآخر مره قبل ما تمشى على طول عملت إبتكار عبقرى فى عالم التنظيف المنزلى.
- النهارده عايزين نلمع كويس يا عواطف، عندنا عيد ميلاد نورا وعلى وفى
ضيوف كتير.
- بس كده!! دول حبابي وبكره يشيلوا حتته تورتته للعيال ولادى.
- طبعا أكيد.
يدوب دخلت المطبخ وحصلت الكارثة... سيادتها طلعت فوق السفره بشحمها
ولحمها وخفة دمها، قال إيه علشان تلمع النجفه.
هوب... قزاز السفره اتدشده تحت رجلها.
وهى إتشعلقت فى النجفه علشان ما تتعورش، وراحت شداها ونازلين هم الاتنين
على الترابيزه.
قصدى اللى كانت فى يوم من الأيام ترابيزة السفره.
باظ عيد الميلاد!!!!

النصر العظيم (١)

يلا نحتفل بالنصر العظيم اللي وصلنا له السنه دي!!
لأ طبعًا، أنا مش باتكلم مع الناصر صلاح الدين ولا "النصر" بتاعنا هو فتح
عكا أو استرجاع القدس .
بس والله العظيم نجاح التوأم في أولى ثانوى لا يقل عندى من هذه الانتصارات
العظيمه بجد . خصوصًا بعدما شفت بعينه كشوف الملاحق والسقوط العامره
بالأسامى الكتيره. المهم قررنا ندخل سينما الأول ونقضى يوم ظريف، وإن شا
الله ماحد حوش، حتى لو انتهى بجولة شراء مجنونه وخلصنا مصروف الشهر،
أمال إيه.. ده نجاح نورا وعلى مش أى حد من العيال اللي بتنجح عادى!
ذوقيًا قلت لهم اختاروا إنتو الفيلم وأنا معاكم. هما طبعًا عارفين إني بانفرج
يدوب على كوميدى أو رومانسى وأعصابى ما تتحملش أى Action وإنى
حتى بتوتر من الأكشن المصرى بتاع أحمد السقا أو أحمد عز، مع إنه أكشن
تعبان .

المهم اختاروا The Avengers وكمان D٣ تخيلوا النصاحه !!
يعنى جابولى فيلم فيه بدل السوبر هيرو الواحد خمسه سته، وكله ضرب ورقع
ورصاص، ومراكب فضاء، وكائنات عجيبه بتنط في وشك طول ما انت بتتفرج .
طبعًا Stark و Halk و Mr. America وكمان البت باتريشيا و
Thor قاعدين طول الفيلم يعضوا في بعض لحد ما اتفقوا يوحدوا الجهود ضد

الشرير Luky وجيش الأستورى الفولاذى ذو الكائنات الحديدية الديناصوريه الطائره.

الفيلم طبعًا تحفة بس أنا مش قده خالص . أنا واحده أعصابى ملتهبه من غير حاجه وأى suspense بيوترنى ويشننج عضلاتى فما بالك بكل ال Super heroes دول نازلين تكسير وتحطيم وعجن وطحن فى بعض وفى الحاجات التانيه!

وألذ حاجه إن أنا حاسه فعلاً إني جوه الحرب دى، وإن ممكن أى حاجه ترشق فيه، أو تلبس فى النظارة D³ المنحوسه بتاعة الفيلم.

Let's finish the story tomorrow!!

أم مصرية حائرة.

النصر العظيم [2]

طبعاً استغلّيت فرصة الـ Break في نص الفيلم وخرجت أحاول أسيطر شويه على أعصابي اللي بقت زي سلك الكهربي المكشوف وأهدى نفسي. إتلكعت شويه، يمكن أفوت كام معركة أو شوية نسف وقصف، ولما رجعت لقيت العيال بيدوروا عليا لحسن أكون تمت ولا حاجه. الحمد لله الفيلم خلص على خير.

انتصر الأبطال. super heroes.

واتهمز الشرير والجيش بتاعه.

وانبسط الجمهور جدًا وهات يا تصفيق.

ولا حد حاسس بالسست اللي أعصابها ادمرت وبقت بتكهرب من كتر التنشنة. بس عادى.

كله فدا نجاح التوأم اللي هو أهم موقعه في حياتي.

نصيحه لكل المراهقين:

الفيلم تحفه ما يتفوتش، هو "إزاي حلوكده" على رأى نورا "ده أحسن فيلم

شفتته في حياتي" على رأى على!!!!

ونصيحه لكل الأمهات:

إوعوا تدخلوا الفيلم، وكفايه الأكشن اللي انتو عايشينه مع الولاد، خصوصًا لو

كانوا في أولى ثانوى.

obseikan.com

جنون الحفلات

Prom Mania

من العادات اللى انتشرت فى مدارسنا مؤخرًا، حفلات التخرج، ويبدلعوها ويقولوا عليها "بروم".

من معلوماتى المتواضعة - كست مخضرمة فى التعليم- إن دى حفلة بتتعمل لما نتخرج، وبتكون بالنهار، وبنعزم فيها الأهل اللى طلعت عينهم معنا طول سنين الدراسه، وعادة بلبس لبس أنيق وعليه روب التخرج. لكن للأسف، السنه دى اكتشفت إن كل معلوماتى غلط وإن التخرج له معنى جديد!

كلمة "بروم" نفسها معناها حفل راقص، ومالهش أى دعوة مباشرة بالتخرج. لكن طبعًا إحنا لما بنقلد حد، لازم نحط الـ "تاتش" المصرى بتاعنا ونزود حته من عندنا.

وبما إني متعودة اشتكيلكوا من التوأم الذيد نورا وعلى.

وبما إني مش قادرة أستحمل أكثر من كده قلت "أفش غلى فيكم" قبل ما يحصل مضاغفات أكثر من التخلف العقلى والعته المنغولى اللى أنا عايشة فيهم من أول السنه الدراسية.

عايزه بس أفكركوا إن على ونورا فى الوقت الحالى - وأنا طبعًا وكل العيله معاهم- محشورين فى عنق الزجاجه، المشهوره بالثانوية العامة.

المفروض إن الواحد لما يكون محبوس في حته، يحاول يفلص ويخرج منها، وبعدين يبقى يحتفل.

لكن احنا بقه في مدارسنا بنحتفل الأول، ونعمل ال "بروم" وبعدين رنا يستر ونتخرج من ث ع.

الموضوع ده محيرنى، وحاولت أعمل أى حاجه علشان يقتنعوا إن التخرج الأول، بس مافيش فايده.

المهم لما فشلت معاهم هما وأصحابهم، قلت أبحث في الأصل اللغوى للتخرج وطبعًا ما وصلتش لأى نتيجة؛ لإن أنا واعرِف إيه علاقة بالزفت ال "بروم" نفسى مشغوله بتحضيرات الحفلة، فعندى كام سؤال نفسى حد يجاوب عليهم:

أولًا: لبييه ال "بروم" اللى بقى معناه التخرج بيتعمل قبل ما العيال تتخرج؟! لا وألذ من كده قبل الامتحان أصلًا!

ثانيًا: لبييه التوقيت بيكون في آخر شهرين تلاته قبل الامتحان. يعنى عز المذاكره والتركيز؟!

وطبعًا الموضوع مش بيتقى على أد يوم الحفله اللى مدتھا قصيره جدًا، يادوب من المغرب للفجر.

استعدادات البنات للحفله من فستان وتالون ومكياج وإكسسوارات والذى منه بتاخذ أسابيع وشهور.

طبعًا كل واحده فيهم منشنه على لقب، ولازم تعمل أقصى استعداد علشان تاخذة.

الفيستان لازم يكون تحفه غير مسبوقه، حاجة تليق بال "ريد كاريت".

نفس درجة التطريز "الهيلز".

الشعر والماكياج أحدث حاجه في آخر أوسكار!

طبعًا الحاجات دى بتدخل فى أسابيع وشهور، وآلاف الجنيهات والخناقات لحد ما تجهز.

وبالنسبه للشباب، بصراحه الموضوع أهون كثير؛ لأن كل الدفعه بتروح تجيب بدل سودا "سوبر سليم" من عند "زارا" وقمصان بيضا وبييون، ويبقوا كلهم - ما عدا على طبعًا - لابسين يونيفورم.

ده طبعًا بالنسبه للاستعدادات العامه فى كل بيت.

أما لو انتى أم أسعدتها الزمان إن يكون ابنها أو بنتها من المنظمين للحدث العظيم، فاستعوضى رينا فى السنه كلها؛ لأن عندهم مسؤوليات أهم من الثانويه العامه أو أى شهاده موازيه.

خدى مثلاً اختيار الفندق اللى لازم يكون أحسن وأفخم من الفندق بتاع الدفعه اللى فاتت.

كده هندور ونعاين ٣ أو ٤ فنادق ونختار أفخم قاعه.

بعدين بقه نشوف مين اللى هايعملنا الديكور والإضاءة.

وبعدين نشوف شركه منظمه علشان تخلص كل حاجه؛ لأن الوقت بيخلص ومش هنلحق.

أما اختيار الفرقة اللى هاتحى الحفله فدا موضوع تانى.

نص الدفعه عايزه أوكا وأورتيجا، والنص التانى عايز مدفعجيه) اه والله العظيم دى أسامى فرق (!)

طبعا voting!الحل إيه بعد كده نقدر نحدد الفرقه، ونحسب التكاليف وسعر

التذكره

ونجمع الفلوس.

ونخضر الدعوات بتاعة المدرسين المحظوظين اللي هانعزمهم.

باقي حاجه واحده بس، وهى أهم حاجه فى الموضوع:

Titles

مين هاتأخذ "كوين"، ومين تستاهل "برينسيس"، ومين "بست دريس"؟!!

طبعاََ المواضيع المرحجه دى بتعمل حزازيات جامده فى نفوس البنات، وممكن

الجوازه - قصدى ال "بروم"- كله يتفركش لو واحده فيهم فقدت السيطرة على

أعضابها وجابت صاحبته من شعرها المعمول؛ لأنها شايفه نفسها أحق باللقب

ده!

أما إن كان على علي ونونى، فأنا مطمئنه وواقفه من بنتى وابنى، وعارفه إن مش

هيفرق معاهم أى لقب بعد ما أنا إديتهم لقب: أحسن توأم فى العالم!

إدعوا معايا ال "بروم" يخلص على خير قبل ما أنا روحى تطلع.

يتخرجوا بجد وبأحسن درجات، وادعوا لكل طلبة ث ع.

أميين يارب.

الروح شفاه

الله ... إيه ده... أنا إزاي حاسه بالخفه والسعاده والرشاقه ديه؟!

هو أنا فين؟!

وإيه اللي حصلتي؟!

يانهارى!! دى أوضتي وده سريري!! مش ممكن!! أنا إزاي شايفه كل حاجه من

فوق كده؟!

أمال مين اللي نايمه على سريري دى وشكلها مرهقه وعيانه؟!

يا الله... أنا مش فاهمه حاجه!

دى أنا!

أيوه، هي دى عيونى، بس إيه السواد اللي حواليههم ده؟! أنا مكانش عندى

هالات سودا، وكانت رموشى أتقل من كده وأطول هو إيه اللي حصل؟!

-اللى حصل إنك أسأتى استخدامى، هلكتيني سهر وقرابه وكحل.

- إنتى مين يالى قاعده تستجوبيني؟!

-أنا عيونك اللي مش عجبكى مع إنك إنت اللي بمدلتينا ونسيتى إننا نعمه من

ربنا لازم تحافظى عليها.

معقول؟! أنا فعلاً برة جسمى، أنا شايفاه من فوق، من مكان جميل وواسع

ومنطلق.

شايفاه تعبان وضعف حجمه الطبيعى.

إزای تخت کده؟! إزای کل مفصل وعضله فيه بتوجع؟!

إزای وصل للدرجه دى من الإعياء والكسل؟!

فجأه صحيت من النوم وقررت عدة قرارات:

مافیش سهر ولا شغل زياده.

مافیش قرايه زياده عن اللزوم.

مافیش قلق وتنشئه.

فى أجازة بجد.

فى ريجيم قاسى.

علشان المره الجايه لما روحى تنفصل عن جسمى وتشوفه من بعيد مايجلهاش

هلع!!!

صباح الفل يا مصر

يوم الجمعة الصبح بدرى.

ماتخافوش. المرة دى مش هاشتكى، مش هاجيب سيرة معبر رابعه، ولا سيرة

التفجيرات والإرهاب والإخوان،

المرة دى أنا فى مود تانى خالص.

مش لإن الغم والهم خلصوا، ولا لإن مشاكلنا انحلت.

لأ طبعا. مش بالسهولة دى.

بس برضه أنا مصره إن مصر دائما صباحها فل وورد وياسمين.

إنزلوا الصبح بدرى يوم الجمعة وانتوا تتأكدوا بنفسكوا.

هتلاقوا مصر الحقيقيه صاحيه، فايقه ومبتسمه ومروقه وجميله.

كل البوابين منهمكين فى غسل العرييات ومسح سلام العمارات.

هتلاقوا راجل كبير طيب واقف على الناصيه، وقدامه قفص عيش بلدى سخن

وريحته تفتح النفس.

هتلاقوا أم ولاء همى وبناتها اللي زى القمر شايلين الخضار الطازه المزهزه على

راسهم ورايحين يفرشوه على الرصيف قدام الجامع.

واحده فيهم هتفرش ورق كرتون عشان يقعدوا عليه.

والتانيه هترص الخضره... ياسلام البنات دى فناهه بجد.

هتعمل من الجرجير والفجل والبصل الأخضر والجزر والفلفل والطماطم لوحه
بديعه.

هتلاقوا أم ولاء قاعده مستنيه زبون الاستفتاح وهى بتقرا الجرنال.

هاكون أنا الزبونه الأولى لإني فعلاً باتفائل بالعيله دى.

هاخذ أحلى دعاء من الست المكافحه دى... وبتنها هاتصر إني ما اشيلش
حاجه وتيجى توصلنى.

مش عشان البقشيش على فكره... علشان هى إترت صح...

على الناحيه الثانيه هتلاقى بتاع الفول ... راجل رفيع جداً، بس وشه منور
بالرضا.

وربنا مقدره يرق عربيه عليها قدرتين فول كبار سخنين نار.

هتلاقى الناس اتلمت عليه؛ لإن الفول بتاعه " لوووز" زى ما هو بينادى عليه.

هتلاقى عربيه بحمار جايه من بعيد عليها أقفاص يوسفى وبرتقال.

هيتهاك لك إن العربيه ماشيه لوحدها ومافيش حد فيها.

لما هاتقرب، هتعرف إن الولد اللي فيها يادوب عشر سنين ومش باين من
الأقفاص.

ما تقوليش إيه الحلو فى منظر عيل صغير أهله مسرحينه على الصبح يشقى طول
النهار؟

هاقولك إن الولد تلميذ شاطر، يبساعد أمه يوم الجمعة؛ لأنه حاسس قد إيه

بتتعب عشانه هو واخواته الصغيرين

فوق المدرعه اللي مرابطه قدام الجامع من شهر أغسطس اللي فات.

هتلاقى العسكرى اللى سهران طول الليل بحمينا كلنا.
هتلاقى زميله اللى جاى يستلم منه مبتسم ونشيط ومستعد ليوم طويل.
بالذمه البلد اللى دول ناسها ممكن يحصلها حاجه وحشه؟!
ممكن أى حد يكسر ناسها ويخليهم بيأسوا من الدنيا؟
البلد اللى صباحها كفاح وشفقا وإصرار ورضا وضحكه من القلب.
لازم يكون صباحها فل.
صباح الفل يا مصر...
جمعه مباركه وسعيده عليكى يا أم الدنيا.

oboiikan.com

البنات البنات

فاكرين أغنية سعاد حسنى؟

البنات البنات

ألطف الكائنات.

أغنيه لذيذه جداً، وطول عمرى بحبها.

لكن عرفت معناها أكثر لما جبت (نوبي) الشهيره ب (نورا الأمورة)

وزى ماقولتلكوا قبل كده فى تدوينه قديمه:

ساعات أحس إنها هى أمى.

لا، ياريت متفهمونيش غلط.. هي مش أرويه، ولا عامله زى البنات اللي

تحسسك إنها مدام سوسه، وتتصرف زى واحده كبيره..

بالعكس.. دى نوبي بنوته قطه وطيوه، ويصعب عليها أى حد تعبان أو غلبان،

وممكن تمشى توزع مصروفها كله فى إشارات المرور.

تخيلوا بقى ممكن تعمل إيه لما تحس إن ماما تعبانه؟

طبعا تفضل تبوس وتحضن فيا لحد ما ازهق وأقولها إرحمىنى الله يكرمك!

طبعا بجزر.. أنا عمرى ما ازهق منها أبداً.

بس بصراحه بوستها غريبه ويتلرز ويتعمل صوت رخم....

أما الحضن بيكون جامد قوى وبيوجع جسمى أكثر!!

بلاش هزار بقى...

نتكلم جد شويه....

فعلاً نوني حبيبتى أحسن حاجه حصلت فى حياتى كلها.

طبعاً هى وعلى.... بس هو مش بيحب إني أتكلم عليه.

ولازم آحد منه إذن كتابى قبل ما أجيب سيرته فى أى مدونه.

لكن نوني بتزعل لو كتبت عن أى حد غيرها.

شوفتي يا نورا.... أديني باكتب تدوينه كامله عشان ساندويش الجبنه الرومى

اللى عملتية الصبح وانا مستعجله.

لسه كمان تدوينه تانيه عشان الخياره وكباية الشاي.

رنا يخليكى ليه يا نوني ويحفظك ويحميكى.

قولوا آمين!!

ملحوظة هامة:

على فكرة نفسك حلو فى كباية الشاي اللى بتعمليلها لى.

أحلى كباية شاي بشرهما كل يوم.

مبسوطه كده... ولا أكتب كمان عن المكرونة بالصوص الأحمر المخصوص

بتاعك؟

سخافات أمهات

الساعة تسعه إلا عشره، والامتحان يببدأ الساعه تسعه.
نورا لسه بتقشر بيضه ومكملتش فطار.
وعلى فاتح الباب ورايح يجيب الأسانسير ...
ده منظر عادى فى بيتنا، وكل صباح عندنا مشكلة التأخير.
الحمد لله إن المدرسه جنب البيت ...
النهارده على ندانى وهو قدام الأسانسير، وكان صوته فيه صيغة تنبيه تشوبها
التحذير:

- ماما... خدى بالك... امتحان النهارده مدته ٣ ساعات!
- طيب.. أعمل إيه يعنى؟
- يعنى ياريت بلاش تليفونات قبل الساعه ١٢ PLEASE!

ملحوظة صغيرة للي مايعرفنيش:

أنا أم من اللي بيستخدموا التليفونات غلط، يعني باكلم ولادي بمعدل كل خمس
دقايق طول مهما بره....
ومش عارفه أتخلص من العاده دى...

خاالص!

طبعا الموضوع ده بيعمل إحراج لعلوش....

وأنا عارفه إن في ولاد تانيين ممكن يطنشوا وميردوش على الأمهات اللحوات

الزنانين من نفس الفصيله بتاعتي....

بس إبني راجل محترم وبيرد عليا، حتى لو كلمته ١٠٠ مرة في اليوم!

هو عارف إن عندي قلق مزمن عليهم هو ونورا وبيطمني كل ما اكلمه...

لكن توصل لدرجة إني أكلمه وهو في اللجنه؟! لأ. الصراحه كتير،

وعنده حق يجذرني....

خصوصا إن الموبايل كان بره اللجنه ومفتوح، والمراقبة -اللى فعلا دمها شربات -

راحت تشوف إيه اللي بيرن، ورجعت في وسط الامتحان وقالته:

- ماما بتكلمك يا على!!

أنا طبعا متخيله الوضع، وعارفه إن أكيد الموضوع عمل حرج ومرج بين الطلبة،

يعني فرصه بهرجوا شويه في وسط الامتحان ويتكلموا...

الساعة بقت ١٠:١٢ وأنا نفسي أكلم على حالا بس مكسوفه من نفسي بعد

التحذير بتاع الصبح. وفجأه التليفون رن!....

- على

-..أيوا يا ماما، إحنا لسه مخلصين امتحان.

مش انا قتللكم؟ على راجل محترم، عارف إني قاعده على نار، وقرر يلحقني قبل

ما اكلمه....

الأكل تحفه

رجعت جرى من المطار على المطبخ.

لسه لابسه الطرحه.

رميت شنطتي على الرخامه وانطلقت على الفريزر، أشوف في إيه جاهز على الطبخ.

بقالى أسبوع مسافره، وكنت طبعا مجهزاهم حاجات كتير تتعمل بسرعه، كل حاجه في مكانها بحطة إيدي.

طبعا ماحدث عبر أكلتي وقضوها دليفرى. لكن أنا ولا همنى.

شمرت وطبخت بأقصى سرعه.

فطست من الحر والفرن.

وضبط السفره وأنا سعيده جداً بإنجازتي في عالم المطبخ.

وقدراتي الفذة في إعداد وجبه كامله صحيه في أقل من ساعه.

ناديت عليهم وأنا كلى فخر:

يلا يا نوني...

يلا يا علي...

يا عبد الله يلا...

الأكل هيبرد.

ولا حياة لمن تنادى.

كل واحد ماسكلى موبايل، أو لاب توب ومنهمك فيه.
وبما إني أم زاناه ولحوجه؛ ماسبتهمش إلا لما سابوا اللي بيعملوه وقاموا على
السفره.

طبعًا أنا مستنيه: "الله! إيه الأكل اللذيذ ده!"

أو واحشنى أكل البيت يا ماما!

أو ياه! أنا كان نفسى فى رز وخضار وستيك!

أو تسلم الأيادى!

لكن للأسف، سمعوني كلام تانى من نوعية:

ياه يا ماما! إيه اللي دخلك المطبخ وانتى لسه راجعه من السفر؟

إنتى غاويه فرهده ليه؟

ماله الدليفري يعنى؟

الوحيداه اللي نصفتنى كانت نورا: الله يا ماما.. الأكل تحححفه!

مش قتللكم؟ أنا ماليش حد غير نوبي ترفع معنوياتي!

اقتصارات صغيرة.. لنورا الأميرة

كسبت نورا الماتش.
انتصرت على بنت جامده جداً من نادي هليوبوليس!
كل مره بنتى تدينى درس فى التفاؤل والإصرار والنجاح.
بجد بتعلمنى إن لسه فى حاجات حلوه ممكن تحصل.
فرحت بجد، وكان نفسى أفرح...
بقالى قد إيه مكتئبه؟
مش قادره أفكر آخر مره فرحت. أكيد من زمن.
عماله أدور على حاجه مفرحه وسط الغم اللي مالى مصر.
وسط حرب الشوارع، وحرب الكلام، وحرب الكراهيه اللي مالىه مصر ومسيطره
على حياتنا ومسمماها.
وسط كل ده جت نونى- الشهيرة بنورا الأميرة- وأهدتنى شوية فرح على قدى.
ولسه ماتش النهارده.
يا رب تكسب وتفرحنى كمان مره.
المره دى هتكون فرحه أكبر.
شويه شويه
ممكن الاكتساب يروح.

شويه شويه ممكن الفرح والتفاؤل يرجع.
كل حد بيحب نوني يدعيها تكسب وتوصل الفينال.
كل حد بيحب مصر يدعيها تكسب الجوله ضد الغم والتطرف وتوصل لبر
الأمان.

قولوا يا رب !!

ملحوظة صغيرة:

ليه العنوان لونه موف ف برتقالي ؟

ده لون لبس نورا إالى خسرت وهي لابساه مرتين.

وصممت تكسب بيه امبارح.

وقد كان.

Thatis my girl!

انتحار روكا!

"إذا كان اللى بيتكلم مجنون ييقى اللى بيستمع عاقل".
ده مثل من بتوع جدتى اكتشفت أخيراً إن حديقة الحيوانات العريقة بتاعتنا عملته
الشعار الرسمى بتاعها.

من إمتى؟

من ساعة ما الدبتين موتوا بعض وهما بيتنافسوا على قلب الدونجوان "هانى"
الدبدوب الحبوب.

من ساعة ما الجمال المغربى دبحت وشوت وأكلت نفسها.

من ساعة ما اللب القطبى فطس من الحر مع إنهم مهيين له الجو القطبى اللى
متعود عليه.

من ساعة ما الزرافه "روكا" شنقت نفسها.

أى والله الزرافه انتحرت!

أنا والله مقهوره على اللى بيحصل فى حديقة حيوانات الجيزه.
طبعاً هاخذ تريقه للصبح.

اللى هاتقول الست دى اتجننت وزعلانه على الحيوانات فى بلد الناس مالهاش
فيها تمن.

واللى هايقفل البلوج ويقول إيه الهدى ده؟

بس أنا برده هاكمل الكلمتين اللي هاينقونى.

أيوه أنا حزينه على الزرافه.

مقهورة بجد.

مش بس عشان دى روح راحت فطيس.

ولأ بس عشان إحنا اللي دافعين تمنها من دم قلبنا.

لكن عشان الحديقه دى ليها مكان فى قلبى وذكريات جميله مع ولادى.

ياما قضينا فيها أيام وهما صغيرين.

أيام ما كان فيها بدل الزرافه الواحده تلاته اربعه.

أيام ما كان الدب القطى لسه أبيض وما تحولش بقدره قادر للون غريب بفعل

القذاره.

أيام ما كانت الزباله لها مكان محدد.

ده طبعًا مش معناه إن الحيوانات كانت عايشه متهنيه ومتدلعه.

بس على الأقل ما كانتش مهمله لحد الاستهبال بتاع دلوقتى.

لحد الدب الأبيض ما يسود وبعدين يفتس من الحر؛ لأن ما فيش تلج ييردله

الفسقيه النونو اللي حاشرينه فيها،

لحد ما الدببه المهيمانه فى حب "هانى" تاخذ جرعة بنج زياده عن الطبيعى،

ويسيبوها تتسلق مكان على؛ فتقع وتتقطم رقايبها.

وبعدين يطلع المسؤولين فى الحديقه يلبسوها للدب الغلبان.

لحد البجاحه اللي تخلى خبر الزرافه يتقال على إنه انتحار مش إهمال.

قال إيه.. الزرافة المتخلفة حشرت رقبتها في السور الحديدي وهي بتاكل من

شجره عاليه!

ولإنها حيوانه غيبه ماعرفتش تسلك نفسها فاتخنقت وماتت!

في ستين داهيه!

زرافه غيبه نعمللها إيه يعنى؟!

غلطت ولازم تتحمل نتيجة عملتها السودا!

فعلاً اللي يغلط لازم يتحمل النتيجة.

خصوصاً لو كان حيوان، لا حول له ولا قوه.

ولا عزاء في الزرافات!

obseikan.com

على الزئبقى

بدأ موسم الامتحانات، كل سنه وانتم طيبين.
ده الموسم اللى أنا وعلى بنلعب فيه مع بعض توم وجيرى.
طبعا أنا توم وهو جيرى.
لأ لأ بلاش التشبيه المهين ده.....
يعنى إيه؟ أنا أبقى توم وأفضل أجرى وراه وكل مره هو يضحك عليا؟
لأ طبعا. التشبيه ده مش مطبوط خالص.
على فى فترة الامتحان بيتحول لكائن زئبقى.
عارفين الزئبق اللى ما حدش بيقدر يمسكه ولا يلحقه؟ هو ده على.
أنا طبعا لازم أتفرغ على كنبه الليفينج (غرفة العمليات المركزية) فى البيت لإنها
تفصل بين الصالون والسفره من ناحيه، وباقى الأوض فى الناحيه التانيه، ومعاهم
المناطق الحيويه الهامه، ألا وهى المطبخ والحمامات.
يعنى أنا أصحى بدرى (علشان هما عندهم امتحانات) أخلص اللى ورايه وآخذ
موقعى الإستراتيجى على الكنبه؛ علشان أراقب جيرى - قصدى على الزئبقى -
وهو ييهرب من المذاكره بمعدل ٣ مرات فى كل ٤/١ ساعه. مع العلم إن ٤/١
ساعه هى أطول مدة مذاكره وصلها فى اليوم كله.
- ماما أنا جعان.

- طيب ها عملك ساندوتشات.
 - لأ، أنا لسه واكل... أنا عايز حاجه تانيه.
 - إيه يعنى؟
 - عايز حاجه حلوه.
 - عندك شوكلاته على السفره.
 - خلصت.
 - طيب عندك كيك فى العلبه.
 - لأ مش عايز... يلا نعمل "وافلز".
 - "وافلز" إيه دلوقتى يا على؟! طيب ذاكر انت وأنا ها عمل.
 - لأ عايز أنا أعملها معاكى دى لعتى.
- وبما أن على حجه فى عمل الـ waffles وبيععملها تحفه؛ أنا دائماً باوافق وأروح ورا الشيف المطبخ علشان أناوله المقادير اللى هو حافظها صم ونبدأ المهمه.
- أولاً: يفضل يضرب فى بياض البيض لمدة لا تقل عن ٢٠ دقيقه - يعنى أكثر من مدة المذاكره اليوميه اللى آخرها ١٥ دقيقه.
- ثانياً: نخلط باقى المقادير مع بعض، ونضيف البياض اللى بقى عامل زى السوفليه برفق وحنان وتأنى لمدة تتجاوز الـ ٢٥ دقيقه.
- وبعدين بقه يجي وقت show time وعلى بيسخن waffle maker ويبدأ شغل الفنان الحقيقى .

والنتيجة "وافلز" تحفه سخنه ومنفوشه وملطخه بما لذ وطاب من صوص الشوكولاته والفراوله والكراميل.

وتبدأ المرحلة الثانية، وهي أكل ال"وافلز" والتي قد تستغرق ساعه ونص.

- الحمد لله، كلنا وشبعنا وحلينا، ممكن نقعد بقه نذاكر؟

- حاضر .

طبعا على أحسن واحد - بعد عبد الله - يقول حاضر في البيت والتنفيذ زيرو.

بعد خمس دقائق ألقيه خارج تاني من الصالون؛ حيث موقعه في المذاكره، وغالبًا

ينبطح أرضًا، ويفرش الورق والكتب والأدوات على الأرض، ويفضل ماسك ال

Blackberry لحد ما أنا أقفشه.

طبعا لذيد، ياخذني على قد عقلي ويسيب ال Blackberry وبعد خمس

دقائق تانين أدخل ألقيه فعلا سايب ال Blackberry بس ماسك ال

I pod!!!

وهكذا، يقضى على الزبقي أوقاته أيام الامتحانات، ويقضى على أعصابي وكل

فرصه لي في التركيز في أى حاجه غير الجرى وراه!

أما عن مواعيد الدروس، فحدث ولا حرج، طبعا دى كلها حاجات صغيره ومش

فارقه مع على، يعنى درس يفوت ولا حد يموت. هو أساسًا بيحضر الدرس مجاملة

علشانى، وأحيانًا مجاملة للأساتذه اللي هاريين نفسهم على الفاضى .

أنا أسفه يا جماعه، مضطره أخلص ال Blog حالًا؛ لاني لحت jerry،

قصدى على الزبقي متجه إلى المطبخ تاني.

وكل امتحانات وانتم ناححين ومركزين.

oboiikan.com

الأم (١)

كل سنه وانتم بخير.. شهر مارس وصل، ويوم ٢١ قرب.
يعنى كل واحد فينا هيجرى يشتري هدية عيد الأم، على أساس إن ده كفايه
للتعبير عن مشاعرنا.
أنا مش هادى نصيحه ولا حاجه...
أنا بس هراجع مراحل الأمومه اللي عملت حضرتك أو سيادتھا، ابن أو بنت:
لو إنتى أم مخضرمه زي .. مافيش داعى تقرأى ال post بتاع الأمومه ده لأنه
بصراحه هيقلب عليكى المواجه.
لو إنتى أم جديده أو على وشك تكونى أم، أو بنوته وأصلاً عندك استعداد فطرى
تكونى أم، ممكن تقرأى علشان تعرفى إنتى ناويه تعملى فى نفسك إيه!...
وما ترجعيش تقولى ماحدث قالى، وقد أعذر من أنذر..
١ - خلىنا نبدأ من الأول خالص..
فى لحظة استقبال الباشا أو الهانم الصغيرين، وهذه اللحظه - لمعلوماتك - فهيا
آلام تعادل آلام كسر (عشرين عظمه) ودى حقيقه علميه، بس يجد أول ما
تشوفى الكلبوظه هتنسى كل اللى جراك.
٢ - من سن شهر لست شهر: ماتحاوليش تنامى... أحسنلك:
رضعى.

وغيرى، وحمى، وبوسى، ولبسى، وقلعى، وإوعى تنسى مشاوير التطعيم.

وزيارة الدكتور-اللى هاتيحي بدون ميعاد- أول ما هتشوفى الترمومتر ويغىمى عليكى.. يا رب تكونى محظوظه، وتلاقى حد يوصلك لدكتور الأطفال؛ لإن مش هتعرفى تسوقى.

٣- من ٦ شهور إلى ١٢ شهر: هتشوفى حاجات عمرك ما شفيتها، وتحسى بحاجات تجنن: القمر هيبتسم ويقهقهه من الضحك لما تلاعبيه.. وهيصوت لو مشيتى من قدامه.

وهيرمى الشخصيشخه فى وشك على سبيل الهزار. ولو بتلبسى نضاره حاولى تجيى عدسات، أو أحسن تعملى ليزك؛ لإن مش هتلاحقى على النظارات اللى بتتكسر وتتشد من وشك. وقصى شعرك - أو اللى باقى من شعرك - بمزاجك قبل ما هو يشده ويقطعه . فى المرحله دى برده هتتحصل حوادث مريعه، لو مش واحده بالك وعينك على الكلبوظه ٢٤ ساعه فى اليوم.

يعنى ممكن يتشقلب من على الكنبه وهو قاعد زى القمر.. أو يتقلب فى سريرك وينزل زرع بصل على الأرض -لا قدر الله-. المرحله دى برده فيها تسنين، يعنى فيها حرارة، وإسهال، وقرينه للصبح وفى عض للركب، لما اللولى بيدأ يبان فى بقه.

٤- فى مرحلة الحبو بقة، إمشى دائماً وانتي معاكى ال "الديتول" فى إيد وفوطه و Mob فى الإيد التانيه، وخليكى دائماً خطوه قدامه؛ علشان تلحقى تنضفى الأرض والحاجات اللى هيحطها فى بقه.

أما لو كنتى محظوظه زياده والبيى قريرعشى قبل الأوان...

إجری بسرعه والحقی إقفلی الحمامات.

شیللی التحف وانسیها قد ٤،٣ سنین.

سدى الفیش بتاعة الکهربا؛ لأنه هیدب صوابعه النونو فیها.

دخلی کل الشباشب والجزم فی الجزامه، وحطی علیها قفل؛ لإن دى مرحله قضم الشباشب.

وسكى البلکونات والشبابیک بالمره؛ علشان تطمئنی؛ لأن دى مرحله القفز المرتفع.

أما المطبخ فانسیه، ما ینفesch تدخلی وهو معاکى، ولا ینفع تدخلی وتسبیه لوحده فی حته تانیه، علیکی بالدلیفرى.

أما مرحله من ٣-٥ سنین، فدى معروفه عالمیًا بمرحلة "الرداله المفرطه" وتلاقى البیبی اللی كان لذیذ وبلعب معاکى ویموت فیکی، وقاعد یحضن ویبوس فیکی طول النهار، تحول بقدرة قادر لكائن غلس وړدل، وكل مهمته فی الحیاة یقرفك...

ویزن علی كل حاجه، ویخرب بیتك شراء لعب والذى منه.

إرحمی نفسك ساعتین تلاته الصبح، وودیة حضانه کویسه بالدولار....

هیتعلم هناك أحلی شتیمة ویرجع یجرها فیکی، وبکده تبقى أهدتی جزائك

إنك تودیة حضانه قبل سن "الغم الرسمى" طبعًا قصدی سن المدرسه الرسمى: ٦ سنین.

أحسنلك هاتیله كتب وعلمیه فی البیت، وأهو كده تكونی بتجهزى نفسك علشان المراحل القادمه. وكله عند الله.

أما باقى المراحل والمهام اللى مستنياكى هابقى أقولك عليها بعدين؛ علشان
عندى حصه English دلوقتى....

ومع ذلك، أحلى حاجه فى الدنيا هى إنك تكونى أم لأحلى بيبى فى العالم.

ويا سلام كمان لو كانت بنت أموره زى نونى، أو ولد راجل زى على

و يا سلام لو توأم زى نونى وعلى، أحلى ولاد فى الدنيا.

ملحوظة:

دى طبعا مش صورة نورا وعلى. صورهم هاتشوفها فى المراحل الجايه لما نوصل

للمراهقه.

الأم [2]

الأمومه وظيفه (طبعًا وظيفه بدوام كامل، ومفروض يكون لها مرتب محترم) متعددة الجوانب والأبعاد والمآسى.

هى وظيفة: unappreciated – unrecognized – unpaid

– هى الوظيفة الوحيدة فى العالم اللى ما فيهاش أجازات، ولا يوم فى السنه، ولا يوم فى العمر، إليك بعض المهام البسيطة:

– وإنتى أم، ساعات لازم تشتغلى منه – برده متعدد الوظائف ...

– لإنك هتفضللى ترى طول النهار: يعنى الساعه سبعه تصحى بتوع المدارس، الساعه ٨ بتوع الجامعه.

الساعه ٩ بتوع الشغل.

والساعه ١٢ البهوات والهوانم اللى لسه مانتخين ومفروض يصحوا يلحقوا الغدا

– طباخ: برده متعدد الوظائف، يعمل حلو وحادق، سخن وساقع، ومحمر ومشمر، وكل يوم ماحدث يعجبه أكلك....

مدرس خصوصى: برده لجميع المراحل..

– فى ابتدائى تعلمى أ، ب، و ١-٢-٣ .

– وفى إعدادى تدخل على ال science والدراسات...

– وفى الثانوى تعترفى إنك محدودة التعليم وتستبدلى وظيفه المدرس الخصوصى بحاجه أجمد وهى:

- السواق :

تلمى العيال فى العرييه، وتروحي توزعيهم على المدرسين، وبعدين تعملى الجوله
التانيه، وتروحي تلميهم من عند الناس اللي بياخدوا عندهم درس.
- ممكن بقه فى النص - وهم فى الدرس - تلاقيلك حاجه مفيده تعمليها بدل
ما تروحي البيت وتنزلى تانى:

يعنى مثلاً تروحي ال Super market تلتقطى شويه جبن وعيش وحاجات
الفطار، علشان المدرسه.

أو تروحي الجزار، أهو يقطعلك حنتين لحمه ينفعوا على الغدا.. بعد المدرسه
أو تروحي العطاره الهنديه، تلمى شويه توابل على مكرونات ورز ..
أو تروحي شركة الإنترنت، تدفعى الفاتوره المتأخره.

أو تروحي السنترال، قبل ما يقطعوا عنك الحراره.

لو بقه كنتى شاطره والمشاوير كلها خلصت قبل ما العيال يخلصوا الدرس، إحترمى
نفسك وسنك وترزعى فى العرييه تحت بيت المدرس...

إستنيهم؛ لإن هيجيلك إنزلاق غضروفى من كتر النزول والطلوع فى العرييه.

أما بقه لو إنتى أم محظوظه زى - يعنى عندك أبطال فى الرياضه - فمهمه الأمومه
عندك هيكون ليها أبعاد أخرى...

أكلمك عليها مره تانيه؛ لأن عندى توصيل دلوقتى... بجد.

أم الأبطال

أم الأبطال لها مواصفات أخرى خارقه للعادة، وهى: الصبر، والتحمل والفراغ..
أيوه.

وتخدى بالك، الفراغ ده حاجه تانيه غير التفرغ...

الصبر: لحد ما كل واحد فى عيالك يقرر هو عايز يلعب إيه بالظبط.

يعنى هتبدأ أى جواز، وسباحه، وباليه أرضى، ومائى للبنات.

وتعدى على ألعاب القوى، والدفاع عن النفس.

وتجربى شوية ألعاب جماعيه، على تنس واسكواش، وربنا يعينك لحد ما يرسوا على
لعبه واحده.

التحمل: لأن كل واحد هيعوز لعبه مختلفه عن اخواته، وهتضطرى تروحي أكثر
من نادى وتتعاملى مع أكثر من مدرب، وتتعرفى على أهالى اللعيه اللي معاه،
ودى حاجه مش سهله خالص

الفراغ: أو التفرغ التام؛ لإنك لازم تكونى مجهزه البيت من مجاميعه: صوانى الغداء،
سندوتشات العشاء، وناشره الغسيل، ومخلصه المكوه، وده معناه إنك تنسى أي
career أو متطلبات شخصيه.

ليه كل ده؟!!

لإنك هتكونى مقيمه إقامه دائمه فى النوادى، بتشجعى الأبطال فى الماتشات،

وتتخاينى مع المدربين لو منزلوهمش الماتش كله، ومع الأهل التانيه لإن طبعًا
ولادك بيلعبوا أحسن من ولادهم! وتحيا الروح الرياضيه المصريه!
الفراغ كمان مره، بس المره دى قصدى فراغ الدماغ؛ لإن الرياضه
والنوادى فى مصر أكيد هاتجيبلك عته منغولى وتخلف عقلى وربنا يعينك.
ملحوظة هامه:

لو عايزه تكونى أم الأبطال المثاليه، لازم تتفقى مع الإسعاف الطائر؛ علشان
تلحقى الإصابات؛ لإن النوادى مش هتعرف الأبطال وقت الغم - لا قدر الله-.
كمان لازم يكون عندك طول بال، وقراءات متعمقه فى علم النفس الرياضى فى
حالات الخساره المتكرره؛ عشان النوادى عندنا مش بتعترف بالتأهيل النفسى
باى دلوقتى لإنى رايجه Wimbledon حاليًا، وانا راجعه احتمال ألحق لى
ماتشين فى ال NBA .

WISH ME LUCK WITH MY CHAMPIONS!!!

أم الأبطال.

إصابات الملاعب

- بلا فخر!
- تاني بلا فخر؟ إنت مش بدأتى "مشروع القراءة" كده؟
- أيوه تانى وتالت أنا حره.
- بلا فخر، أنا أكثر أم حريت على طوارئ المستشفيات، مش بس فى مصر، ولكن فى دول وقارات أخرى.
- عيالى - الحمد لله - لداذ بجد، وهو ايتهم منذ نعومة أظافرهم يربونى ويجرونى أنا وباباهم على المستشفيات بأنواعها .
- أدوار الحرارة العاليه "Fever" كان لازم تبدأ معاها فى عز الليل، بعد كل الدكاتره ما يروحوا ويناموا.
- نوبات ضيق التنفس والحاجه إلى أكسجين، كان لازم تيجى بعد الفجر مباشرة، وتشهد علينا مستشفى Richland Memorial إن أكثر طفله دخلت فى حاجه إلى أكسجين كانت نورا، مبتكرة حساسية الصدر.
- بس الحمد لله، خلصت أمراض حساسية الصدر، والعيون، والجلد مع سن المراهقين، وبدأت أمراض تانيه (عقلية) غالبًا.
- أكثر واحد راح لدكتور عيون وحط قطرات، هو الفردة التانيه للتوأم على. اللي كانت حساسية عينيه موضع تأمل كل واحد يشوفه، خصوصًا فى الصيف والتراب بتاع مصر .

والحمد لله، زى الغل لما كبر - ما شاء الله لا قوة إلا بالله- قولوا معايا.

بس هل أنا بطلت أروح مستشفيات وطوارئ؟

لأ طبعا، ده مقدر ومكتوب.

يعنى مره قاعده فى حالى ومبسوطه بتفرج على التلفزيون، لقيت الرياضى الأول فى

العيله داخل عليا بكل فخر واعتزاز، وبيقولى بكل بساطه وهو حاطط منديل

على عينه الشمال: يلا يا ماما هنروح الطوارئ حالا!

الرموت طار من إيدى، ونورا وعلى بيقولوا إني كنت هأقع من على الكرسي ورا

طبق اللب اللى اندلق فى الليفنج .

فى إيه؟ مال عينك ورينى؟

ما تخافيش يا ماما دى حاجه بسيطه. النضاره إتكسرت على عيني لما كورة

الباسكت إتزرعت عليها جامد.

أغمى عليه شويه، بس قمت جرى بعد ما "أغمن" عليا، على رأى الناشطه

"فيفى عبده" ورحنا الطوارئ وبقية العيله وانا لما عرفوا.

فعلا العين عليها حارس.

خيطننا الحاجب المعجباني الجميل، وكنا بنغير عليه يوم آه ويوم لأ، وبطلنا نلبس

نضارات فى التمرين، وجبنا طقم lenses للأبطال كلهم.

بس هل كده أنا بطلت أروح الطوارئ أو "يغمن" عليا من الإصابات؟

لأ طبعا، ما هو أنا أم المصابين.

بكره نكمل.

الصين ومطار تشفيق

لما كتبت أول بلوج عن الصين والأكل في الصين، انمالت عليها التريقه و"السف" على رأى عبد الله، يعنى فى ناس قالت هو إيه يعنى حد يروح الصين أصلاً؟ واللى قال: هى بلاد السياحه خلصت، ولا أوروبا قفلت ولا إيه؟ واللى قال: إيه المزاج العكر ده؟ إنتوا عيله غريبه بجد.

وعلشان دول بالتحديد؛ أنا قررت أحكى حكاية الصين من الأول خالص، وأغيزهم أكثر.

بين ليلة وضحاها، ولأسباب لا يعلمها إلا الله، قررنا نساfer الصين للسياحه. ليه الصين بالذات؟ بصراحه لا أنا ولا عيلتى الكريمه نقدر نفسر لكم القرار العجيب ده؛ لإننا كعائله مصريه نتشبه بحكومتنا العصماء، لا نستطيع تفسير أى قرارات مصريه من اللى بناخذها فى لحظات خاطئه.

وهو يعنى ده أول قرار عجيب ناخده؟! ما هى كل حياتنا ماشيه بأسلوب التخطيط العشوائى المصرى الأصيل. عادى يعنى.

المهم، سافرنا بكين، وكانت رحلة الطائرة أول الغيث -رحلة عذاب على متن مصر للطيران العريقة- برضه: ليه عذاب؟

مش بس علشان المده طويله (١٠ ساعات تقريباً) لكن علشان الكراسى مريحه جداً، الحمامات نضيفه جداً، والأكل روعه- من النوع اللى يجرضك على الصيام بمجرد ما تهل ريجته عليك.

المهم تانى، الحمد لله خلصت الرحله على خير، ونزلنا مطار بكين.
وزى ما الجواب ببيان من عنوانه، برضه البلاد بتبان من مطاراتها، المطار يجنن:
واسع، مريح، فاضى، بالرغم من الهجوم المصرى اللى نزل جرى من طائرة مصر
للطيران.
الإجراءات سلسه وسهله، والطوابير منظمه وآدميه، وضباط الجوازات معظمهم
بنات حلوات - يقابلوك بإبتسامه ويخلصوا الإجراءات فى ثانيه.
انبهرنا بالشوارع والمساحات الخضراء الشاسعه، وأنواع الأشجار والنباتات فى كل
مكان، حتى على الكبارى، زرع وزهور، وأغرب شىء سيولة المرور فى مدينه عدد
سكانها ٢٨ مليون، وكلهم بيشتغلوا.
بصراحه زعلت قوى على مصر وشوارعها، ومطار القاهره، اللى شفيق فضل يدلنا
بيه طول الانتخابات كفخر لكل مصرى. عمار يا مصر!!

تحياتي من الصين

الصين بلد جميله وكل حاجه، بس من ساعة ما وصلناها واحنا بتتعذب
ونتضور جوعًا. لا عارفين ناكل في الفندق ولا المطاعم، خصوصًا بعد ما العيال
شافوا المحلات اللي بتعرض بكل فخر واعتزاز لحمة الكلاب والحمير والخنازير!
وعشان تعرفوا حجم المعاناه اللي احنا فيها، إليكم الحادثه بين أفراد العيله الكريمه
في مطعم الفندق:

على: يا نهار اسود! حتى البيض المسلوق حاطين عليه touch بتاعهم؟!
عبد الله: إحنا مش هينفع ناكل أى حاجه في البلد دى، أنا جعانا ان إيه القرف
ده!!!

أنا: على فكره يا على ده بيض مسلوق عادى، بس سالقينه في شاي بدل الميه.
أنا هجرب واحده!!!

نورا الأموره: آه يا على، ماما صح، حتى شوف كاتبين: tea eggs
على: طب يا فالحه، روى قشرى واحده وكليها، روى روى، ما روحتيش ليه؟
أنا طبعا مش مقتنعه باللى بقوله للعيال، بس نفسى ياكلوا أى حاجه بعد ما
فشلنا ناكل في مطاعم عاديه، والمطعم الإسلامى اللي كنا سائين سنانا عليه طلع
. under construction

المهم أخذت البيض المسلوق، وشوية خضار مسلوق من بتاعهم، وقلت ربنا يعين وأقدر أأكلهم؛ عشان أثبت للعيال إننا ممكن ناكل عادى من ال western buffet بتاع الفندق، مع إنه لا western ولا أى حاجه. قعدت وبدأت أقشر البيضه بكل شجاعه، ومش متخيله إن على واقف بيراقبنى من بعيد عشان يشوفنى هاكلها فعلاً ولأ إيه...
طبعاً إبنى ناصح وما تخيلش عليه حركات الأمهات المفقوسه بتاعتى.
أول ما خلصت تقشير البيضه ولاقيتها سودا وريحتها زى الزيت، إديرت أدور على أى باسكت أرميها من غير ما العيال يشوفونى ويشمتوا فيا.
مفاجأة!..

لقيت التوأم العجيب، وعبد الله ناطين ورايا:
قفشناكى يا ماما وانتي قرفانه من الأكل زينا وبتحاولى تخيلنا ناكل وخلاص.
وهنا انهارت محاولاتي للتماسك قدام الأكل، ورحت معترفه لهم إني أنا كمان مش ناويه أكل الخضار المرير اللى فى الطبق، وطلعنا كلنا أوضتهم ناكل بقية الشيبسى اللى كنا جايينه من مصر ومحوشينه لبقية الرحله؛ لإن حتى الشيبسى بتاعهم فيه دهون مريبه!!!!

وليمة فندق بكين

بعد أسبوع من الجوع، قررنا نتصرف بطريقتنا، ونتفقد seven eleven supermarket يمكن نلاقى أى حاجه تتاكل، وقد كان. الحاجات الصالحه للأكل اللي تعرفنا عليها كانت: توست، بيض مسلوق فى ميه، جنبه شيدر، وكله ساقع، من التلاجات. خدنا الوليمه الساقعه وقعدنا فى أوضة العيال على السراير... - خد طبقك وكل بسرعه علشان التانيين ياكلوا (الطبق الوحيد لإننا مسافرين أكثر من مدينه، ومش هنشتري طقم أطباق ونشيله من بلد للتانى). . إيه الأكل الجامد ده؟ لأ وكله سخن نار! إيه يا ماما العذاب ده؟ . هو كده ولو مش عاجبك إنزل كل فى أى مطعم. . لا والنبي إلا المطاعم، هاكل طبقى، بس حضريلى كمان كام ساندوتش بيض لإبنى واقع من الجوع. والله فعلاً الحاجه أم الاختراع، واللى ماكانش عاجبهم أكل البيت بأصنافه بقوا هيموتوا على أكله واحده من إيدى، حتى لو كانت ساندوتش بيض ساقع أو شيدر متلجه. مافيش بقى رفاهيه، سخنى التوست يا ماما فى التوستر، أو سيحى الجبنه فى المايكرويف، أو بلاش البيض المسلوق ده، واعملى لينا بيض عيون. العيال بياكلوا بكل شراهه وشهيه.

وبعد حفلة السندوتشات الساقعه، بدأوا يعملوا علب الإندومى اللى جابوها من السوبر ماركت؛ لأنها كانت الحاجه الوحيده اللى عرفوها هناك. والحمد لله إن غرف الفندق كان فيها kettles وبدأوا يدوقوا الإندومى الصينى ويصوتوا من الطعم والريحه المريعه.

نورا بقى كانت مددت على السرير بعد أول ساندوتش وراحت فى سابع نومه؛ لأن كان بقالها أسبوع مش عارفه تاكل أى حاجه وطلعت السور العظيم على لحم بطنها وكانت ميته من التعب.

بعد خمس دقائق، على حصلها على السرير اللى جنبه، وعبد الله كان شكله مونون وعائز ينام وسيناهم يكملوا نوم للصبح.

دى كانت أول مرة من ٥-٦ سنين ولادى يناموا الساعة ٨ مساءً! بركات الصين.

وسور الصين العظيم!

نصيحه هامه: لو عايزين تتهوروا وتروحوا الصين، إملوا شنطكوا أكل؛ لأن مش هتلاقوا أى حاجه هناك تتاكل!

ومع ذلك، البلد تحححفه وتستاهل الزياره، واهو ريجيم إجبارى يفوت ولا حد يموت.

تخاريف صينية

- فيه ايه؟ هو الواد ده بيشتغلنا ولاّ إيه؟ يعنى إيه كل صنم من العفاريت بتوعهم
دول له نفس المعنى؟

- لو ماكانش الصحة يبقى السعاده والعمر الطويل والفلوس!

- إيه الهذى اللي هو عمال يقوله هو مصدق الهبل ده؟

- ممكن تبطلوا سف على الواد وتسألوه على اللي عايزينه من غير غناته؟

- Hey, Harry, why does everything you show us stand for
happiness, wealth, money and protection?

- الواد هارى فطس من الضحك لما عبد الله سألّه، وعرف إن احنا فاهمين إن

كل ده كلام فاضى. يعنى بلغة العيال، فهم إن إحنا "هارشينه" و"فافشين" إن
الحكاية كلها نصب.

ومع ذلك، ما بطلش يشرح لنا المعاني الرمزية الخفيه للكائنات اللي هما عاملين لها
تماثيل فى كل حتته، وحتى الألوان عندهم لها معاني ودلالات.
شعب عقد بجد.

أما ألد حاجه، كانت وصفه للتنين أو dragon وهو ممشينا كلنا وراه، وعمال
يشرح لنا جمال وفضائل الكائن الأسطورى العظيم:

It has the head of a horse, the eyes of a turtle, the scales of fish, the tail of a monkey, the ears of a lion, claws of an eagle and body of a snake.

- یعنی باختصار، کائن کامل من مجامعیه، و مش ناقصه غیر عقل عصفوره أو

نله! ورزق الهبل علی المجانین!

طبعًا التعليق الأخير ده بينى وبينكم، أحسن هارى يزعل.

P.S.

I have written the blog two months ago and forgot to post it. I stopped writing due to the current events. The twins said we should celebrate this day 12-12-2012 and here i am trying to put a smile on our faces. we deserve it after all.

نصاحة نورا فى الصين

Come come, lady lady. Take umbrella only this 300 Yuan

الترجمه: بياعه صينييه تلمه، بتحاول تستهلنا أول ما شفتنا أنا ونورا بنصص على الشمسيات اللي فى إيديها.

طبعا كان لازم نشترى شمسيات بعد الدش اللي خدناه امبارح لما ما سمعناش كلام الواد Harry ال guide بتاعنا وقلنا إيه الهبل ده؟ شمسيات ايه اللي عايزنا ناخذها؟

دا الجوزى الفل.

هو الواد ده بيشتغلنا عشان سواح؟

طبعا طلع هو صح واحنا سياح هبل، وخذنا الشتوايه على دماغنا والحمد لله إن السواق رضى يركبنا العرييه واحنا هدمونا تتعصر.

المهم سينا من Harry والمطر وخلينا فى البياعين واستهالهم.

كل واحد ماسك calculator فى إيده عشان مش بيعرفوا يقولوا الأرقام بالإنجليزى، ويبضروا أسعار خزعبلتيه على أساس إن السياح عندهم عته منعولى وهيدفعوا على طول.

بس على مين؟ دا حتى نورا إتعلمت الفصل منهم، ولاقيتها بتقول للبت اللي عايزه تبيع الشمسيه بـ ٣٠٠ يوان:

No, ten Yuan !!!

تصوروا نورا الأمور ونصاحتها الزيادة!

طبعًا البياعه لوت بوزها وما عبرتناش، وراحت تدور على سياح هبل بجد.

بطيخة عبد الله

لإن عبد الله راجل محترم وبار- يجد ده مش سف - قرر فجأه إنه يساعدنى فى المطبخ لما لقانى محتاسه.

- أيوه يا ماما أعمل إيه معاكى؟

أنا فى الأول مصدقتش ودانى، بس سكت، يمكن عبد الورد فعلاً صعبت عليه وأنا لسه راجعه من الصين ومضطره أعملهم غدا؛ لإنهم بقالهم أسبوعين ما كلوش وممكن ياكلونى أنا.

- ممكن تغسل البطيخة اللى على الأرض ديه وتقطعها نصين وتخطها فى التلاجه لإنها ثقيله عليا؟

- حاضر.

يا سلام عليك يا عبده، أحسن واحد فى البيت يقولى حاضر....

بس نادراً ما ينفذ، بس برضه كويس، أهو بيريجينى فى الكلام وياخدنى على قد عقلى لحد ما اسكت وأنسى أنا كنت عايزه إيه أصلاً.

لكن المره دى طلع جدع، ونزل جاب البطيخة من على أرض المطبخ، وراح على الحوض، وراح رازعها فوق الأطباق الوسخه... عادى خالص!!

لما لقانى بصوت، إتخض وقالى فيه إيه؟ هو أنا عملت حاجه غلط؟

بصراحه اتكسفت من نفسى... يعنى الموضوع مش مستاهل الهلع اللى عملته

ده!

- لآ، بس ياريت ترفعها علشان الأطباق وسخه، واغسلها لحد ما أجب فوطه
ننشفها بيها.

أهه... لسه بحاول أمسك أعصابى وأكون أم هاديه ورزينه. شاهدين؟
على ما اتديرت أجب الفوطه المتعلقه على الحيطه، كان هو طلع البطيخه بميتها
وغرق لى الأرض كلها وهو ماشى لحد الرخامه...
قلت معلش، الباشمهندس لسه مبتدئ فى شغل المطبخ، ورحت حاطاله الفوطه
على الرخامه علشان ينشف البطيخه اللى بتشر ميه.
بعد شويه...

- ماما، ننشفتها أستخدم أى سكينه؟

- الكبيره اللى فى الدرجه التانى.

- وانشغلت فى الحوض والأطباق، وهو واقف ورايا بيساعدنى فى دبح العجل -
قصدى البطيخه-.

- خلصت، أدخلها أى تلاجه؟

- إستنى هاديلك صينيه تحطها عليها.

أتارى الهندسه قطع البطيخه نصين فعلاً، بس كل نص مش قد التانى، لآ وإيه
قطعها على الفوطه البيضا اللى بنشف عليها الفاكهه، وبقت أبيض فى أحمر
وبينك!!

يعنى هو فاهم إنه أنجز المهمه الصعبه بنجاح، وأنا مفروسه لأنى لسه هانشف
الأرض، وأغسل الفوطه، وأمسح الرخامه اللى غرقانه فى دم العجل - قصدى
البطيخه- بصراحه ما قدرتش أمسك نفسى.

- إيه المهندسه دى كلها؟ هم دول فعلاً نصين.
- أيوه ... أيوه، سفى عليا بقه علشان مش قد بعض. طب يعنى أنا هاحل المشكله دى واقطع حتة من النص الكبير وأخرطها لك فى طبق وتبقى جاهزه على الأكل.
- Ok... تشكر يا عبده.
- فعلاً، طلع بوله كبيره من الرف، وقعد يحاول يظبط النصين قد بعض. أكيد ساعتها حس إن كرامته الهندسيه أهينت من واحده كانت أدبي أصلاً.
- ماما، خلاص، إقفشى الطبق ده علشان أدخل "النصين" اللي قد بعض بالظبط فى التلاجه. قال كده بكل فخر!
- إيه ده؟ إنت مقطع ده لمين؟
- ليكى علشان يبقى جاهز بعد الغدا.
- مين هياكل الفرافيت ديه؟
- يا ماما فوتى، كده أحسن علشان محدش ياكل كتير.
- هو خرج من المطبخ من هنا وأنا دلقت طبق "فرافيت" البطيخ فى الخلاط وعملته عصير قبل ما حد يشوفه.
- ومع ذلك... شكراً لذوقك ومساعدتك يا عبد الله.
- ياريت كل الناس زيك.

obseikan.com

عجلة على

- عايز race
- إحنا مش مستغنيين عنك.
- إيه! هو كل واحد راكب Race بي موت يعني؟
- تقريبًا.. بدمتك في شارع في مصر ممكن تمشي فيه بـ Race؟
- دى شوارع مصر المنيله الزحمه ديه هي اللي ينفع يتمشى بيها بـ
- Race وبعدين بيعدى من بين أى حاجه، ولا إشاره ولا حاجه.
- ولأ صوته، تحفه بجد، تحفه.
- والنبي تسكتي انتي وبطلتي تكبريها في دماغه. هو إنتي مالك ومال ال
- race.
- طبعا هاركب وراه ونروح بيها كل حته.
- حتى علشان نريحكم من توصيل الدروس، يعني إنتي الكسبانه في الآخر!
- لأ شكرا. أنا مش عايزه أكسب حاجه من وراكو.
- طيب خلاص، بلاش race خرينا في العجل، أظن ده بقه آمن، وصديق
- للبئنه، وممكن يمشي على الرصيف عادى.
- لا والنبي! هو فين الشارع اللي فيه رصيف في مصر؟ هي الناس بتعرف تمشي
- على الرصيف لما العجل هيمشى عليه؟!
- وانتصر على، وجاب العجله المتينه.

وركنها في الصالون، الحته الوحيده في البيت اللي محدش بيقتعد فيها.

- روح بقه الدرس بالعجله يا على .

- لأ أنا مستعجل مش هالحق.

- طب انزل اشتريلي حاجات بيها.

- يا ماما فكك، ما عندك ال Delivery الدنيا حر ومش ناقصه

فرهده.

وكل فين وفين على ما على ياخذ العجله المسكينه في جوله سريعه، وأفضل أنا

على نار لحد ما يرجع.

لكن بصراحه، العجله طلعت فعلاً مفيده بالنسبه لى ... ليه؟!!

لإن عبد الله هو اللي بياخدها ويسبلى عريته... ومزاجه.

يعنى على دفع تحويشة العمر في العجله، وعبد الله استلمها هديه جميله.

يا رب احمي ولادى واحفظهم من كل سوء وشباب المسلمين.

قولوا آمين.

سلاحف النينجا

عندنا سلاحف مائيه صغيره، دى مش أول مره نربى سلاحف أو pets عمومًا.
يعنى كان عندنا عصافير زمان...
كان عبد الله بيشتريهم ويطيرهم لما يصعبوا عليه.
ومره وهو راجع من رحله مع المدرسه، لاقيته جايبلى هديه حيه: فار من فضيلة
الخنازير، اسمه "جبنى بيح".
وكنت عايزه أرميه من البلكونه هو والفار اللى كان شاربه وحاطه فى صندوق
كرتون، وحامى بكل فخر واعتزاز يفرحنى بالزائر الجديد!
بس الحمد لله، تانى يوم لقينا الضيف الثقيل انتقل إلى العالم الآخر فى
الصندوق، وطبعًا عملنا له جنازه مهيبه:
عبد الله نزل قدام العماره، وجمع اخواته وأصحابه وعملوا حفرة تليق بالمرحوم، ثم
واروه التراب....
مع الدموع الحاره. ربنا يجعله آخر الأحزان وكله بيتنسى...
ونقلنا من مرحلة الطيور والفيران لمرحلة الحيوانات المائيه.
بدأنا بالسملك بأنواعه، وبأما كنا بنشد عليه السيفون لما يفتس فى الحوض
بتاعه؛ علشان نبقى عملنا الواجب ودفناه فى بيئته الطبيعيه، وبيقى رجع للنهر
الخالد.

المهم.. حد ابن حلال شار علينا بالمرحلة النهائية:
الكائنات البرمائية الخضراء.. على أساس إنها متينة وبتعيش ومش عايزه مجهود
جبار في العناية والتنظيف.

وللاحتياط، قررنا نوزع المهام بعداله متناهيه، فكان التقسيم كالاتى:
- عبد الله يأكل الزلاحف اللى هو مسميها "هالك وأحمر الودان" على أساس
إن فيهم واحد مقترى وممكن ياكل كل دقيقه، مع إنهم مفروض ياكلوا مرة واحده
كل يوم.

- نورا عليها التنضيف، يعنى كل يوم فى نهاية الأكل تاخذ السلاحف اللى هى
مسمياها: عصام وهبه، وتحميمهم وتدعكهم بفرشة الأسنان...
وبعدين تغسل البحيره (الطبق) بتاعهم وتحطلمهم ميه من الفلتر.
- طبقًا أنا مهمتى هايفه وغير معلنه، وماهلاش علاقه بالموضوع أصلاً:
تنضيف الحمام بعد ما نورا تزروطه، وهى بتديهم الـ shower بتاعهم!
أما الملك على:

أما هو فعليه يلاعب الفريق...

شفتوا العدل!

- زى العدالة الاجتماعيه اللى فى البلد كلها!

وصفات مجربة

- وصفات إيه بس!
هو إحنا ناقصين أكل؟! دي برامج التلفزيون هاريانا أكل صيني على هندي
على موزمبيقى. والنبي بلاش وصفات.
- مين قال إني هاكتب وصفات أكل؟ هو ما فيش صبر؟
- ما اعرفش، أهو أول ما كلمة وصفه تتقال، يجي فى بالننا الأكل، أو ساعات
وصفات التجميل بتاعة أمينه شلبايه وإخواتها .
- ولا دي كمان، تجميل إيه؟! هو أنا بتاعة الحاجات دي؟! دي وصفه
علاجيه.
- للبرد يعنى ولا إيه؟
- يا ستي اصبرى عليا، دي وصفه للصباحات الشتويه أو الخريفه ...
لما تلاقى نفسك عايزه ما تقوميش من السرير، ولا تعملى أى حاجه فى الحياه.
لما تصحى على شواكيش بتضرب على نافوخك، وسيخ محمى داخل من صرصور
ودنك اليمين وطالع من الناحيه الشمال، ومكهرب المجال المغناطيسى اللى إنتى
عايشه فيه كله.
- ويا سلام بقه لو كان بيصاحبه شوالين رمل وشوالين ملح، واحد من كل نوع
كابس على كتافك ورقبتك.
- الله يرحم ال magical mornings بتاعتك، هى راحت فين؟

- يا بنتى هي الدنيا كده، مره حلوه و ٥٠٠ مره صعبه، يعنى ال magical mornings دى بتحصل كل فين وفين. آمال إيه مش سحريه؟ خلينا بقه فى الوصفات اللى ممكن تقلب صباح الشواكيش والرمل لصباح سحرى أو شبه سحرى.

- عادى يعنى: إثنين بنادول على ٤ ، ٥ فناجين قهوه والدنيا تمشى .
ما هو انتى ها تصحى يعنى هاتصحى؛ لإن فى ناس رايحه المدرسه، ولو ما صحيتهمش مش هيقوموا، وناس تانيه عندها شغل برضه مش هيروحوا!
-لأ، دى حلول تقليديه، أنا باتكلم على وصفات نفسيه تغير مزاجك بجد من غير أدويه ولا قهوه.

ألبوم الصور:

- أى صور دى اللى هتعالج الصداع والروماتيزم المزمز؟!
- أى صور من حقبه زمنيه قديمه حبتين، يعنى صورك مع عيلتك وانتي صغيره وسعيده أيام المصيف مثلاً، لما كانت الناس بتروح راس البر، قبل ما يبتعدوا مارينا والساحل.
- مالها يعنى الصور دى؟
- تعالى إتفرجى معايا وانتي تعرفى....
- امتدت قعدة الصور ساعتين واحنا بنقلب الصور القديمه والأماكن الجميله، ونضحك على مناظرنا وإحنا سود متفحمين؛ لأن كريمات sun block كانت شاحه فى الزمن ده.

- إئتو مین لا مؤاخذه اللى قاعدین مع بعض؟
- أنا ونفسی، ما هو لازم كل شویه الواحد یکلم نفسه ویشحنها بذكریات جمیله من ألبوم الصور.

عودة للمدونة

مش غريبه شويه إن القراء الأحباء يسألوا نورا بدل ما يسألوني أو يبعثولي
COMMENTS أو MAIL ليه أنا ما بقيتش باكتب كل يوم Blog

جديده؟!؟

ويقولوها: إيه؟ فين مدونة مامتك؟ كل ما نفتتح ما نناقش حاجه جديده ليه؟
الظاهر إنكم فعلاً افتكرتوا إن نورا مامتى وولية أمرى ومحرة المدونة بتاعتى!
أنا طبعا لا يمكن أنكر فضل نورا الأمور فى نجاح المدونه وزيادة عدد القراء.
طبعا مش هاعمل زى القلط آكل وأنكر، ولازم أعترف لكم إن أول القراء كانوا
أصحاب نورا، وهما زى العدد فى اللمون.

كل ما كنت أحط post جديد تروح واخده link وتحطه على ال wall
بتاعها وأنا أدخل أنام أصحى، ألاقى عدد القراء زاد ١٠٠، ٢٠٠، ٣٠٠ حسب
كفاءة الأخت نورا الأمور وحسب نوع ال Blog وموضوعها. يعنى أكثر
المدونات فى عدد القراء هى كالتى:.

١- موقعة البجع.

٢- نورا الأمور.

٣- القائد على (٢).

٤- شعر على فى راس على.

٥- حملة إنقاذ العصافير.

أنا مش عارفه لو إنتو، ك Readers بتشوفوا ال counter بتاع ال Blog والموقع الجغرافي للقراء ولأ ده بس خدمه لصاحب البلوج؟! لكن الشيء العجيب فعلاً، إن فيه كتافه عاليه جداً من القراء في أماكن عجيبه. يعني بعد مصر، فيه السعوديه، وبعدين أمريكا، وأجزاء من كندا واستراليا والاتحاد السوفيتي (هو خلاص إتفكك، بس على أيام ما كنت أنا بادرس جغرافيا كان إسمه كده). هو ده بالظبط السبب اللي خلاني أبطل كتابه شويه وأشغل نفسي بمحاوله عميقه لفهم موضوع روسيا ده. يعني السعوديه ok عندي هناك أصحاب ومعارف، وأكد بيعملولي شغل في ترويج المدونه. مصر طبعاً أم الدنيا، وفيها أصحاب نورا وعلى وعبد الله، أمريكا فيها برضه معارف وطالبات من اللي درستهم استقروا هناك. لكن أموت واعرف مين اللي بيقرأ المدونه بتاعتي في روسيا؟! مش معقول أصلاً حد هناك يكون بيقرأ عربي، ومش معقول نورا وصديقاتها يكونوا أثروا في روسيا وأقنعوا الناس هناك يتعلموا لغة الضاد ويقرأوا لي! فجاه اللمبه اللي في دماغى نورت، وعملت SCAN سريع لأصحابنا ومعارفنا القدام!.. لقيت إن الباشمهندس عبد الله - باعتبار ما سيكون في خلال سنتين.. ثلاثه.. أربعه - كان عنده صاحب روسي في أمريكا، وغالبًا - والله أعلم - هو Vetaly الروسي، اللي بيقرأ ال Blog في روسيا، وهو اللي عطلني أسبوعين عنها.

شوفوا بقه إنتوا عايزين تعملوا إيه فيه وأنا هانفذ على طول!!!

obeyikan.com

بروفيترول حبيبه [1]

كل سنه وإنتم طيبين.

رمضان كريم... ولازم إحنا كمان نحاول يكون عندنا شوية كرم...

عشان كده كل سنه فى رمضان، كل فريق التنس، الجامد جدًّا جدًّا جدًّا

بتاع نادى المقاولون العرب (هو يعنى مش فريق بالضبط، بس روح المدربين

واللاعبين فيه فعلاً أحسن من روح أى فريق رسمى) - ومنهم طبعاً توأمى اللذيذ-

بيعملوا فطار جماعى.

كل واحد أو واحده - player or coach - يجيب حاجه، وكلهم يفطروا

مع بعض فى النادى.

طبعاً فى ناس كل سنه بتستهيل وتجيب حاجات جاهزه - هما أكيد عارفين

نفسهم، على أساس إن اللى على راسه بطحه بيحس بيها - وفى ناس تانيه

غاويه فرهده بتنوع، وتعمل صوانى ومحمر ومشمر والذى منه.

أما الحلويات، فحدث ولا حرج. كنافه على بسبوسه وقطائف، وحتى ساعات

ناس من إياهم بيحبيوا جاتوه أو تورته علشان يخلصوا.

وبما إن الإعتراف بالحق فضيله؛ فأنا كمان من اللى بيكروتوا العميال فى الحلويات؛

لأن بينى وبين جميع المعجنات - ما عدا ال waffles اللى على بيعملها معاين-

عداوه شديده، وتار بايت.

يعنى لو عملت كيك يطلع ساقط من النص، أو محروق من تحت.

ولو عملت سينابون يطلع عامل زى fossils المتحجره من ملايين السنين،
وتضره في الحيطه يرجع يعورك في وشك.
وطبعًا من المنطقى إني أشتري حلويات جاهزه وخلاص، ولا يكلف الله نفسًا إلا
وسعها، وبلاش أعمل فضايح للعيال في النادي قدام أصحابهم ومدريينهم.
أمال إيه العنوان الفظيع ده اللي هيخلى العيال يريلوا وهم صايمين؟!
بكره أحكى لكم.....
وكل سنه وإنتم بألف خير....

بروفيترول حبيبه [2]

كل سنه وإنتم طيبين.

رمضان جانا، جانا بسرعه، يعنى أنا حاسه إن لا يمكن يكون فات سنه كامله

من رمضان اللي فات.

نرجع لموضوعنا....

ألد وأحلى وأشهى طبق حلو بيتعمل فى عزومه

النادى هو البروفيترول....

وبتعمله اللاعبه الأمور حبيبه، من غير مساعدة أى حد، لدرجة إنها بقت خبيره

فيه، ومصدر ثقته لكل بنوته نفسها تدخل المطبخ من غير ما تطلع بعاهه

مستديمه، أو أكله محرجه تسوء سمعتها المطبخيه بقية حياتها.

قولوا ما شاء الله معايا على حبيبه وبروفيترول حبيبه اللي كل الناس بتستناه من

السنه للسنه، لدرجة إنهم مستنين رمضان مخصوص علشان ياكلوه تانى وكاتبين

على الـ walls بتاعتهم فى "face book البروفيترول على الأبواب" بدل

"رمضان على الأبواب!" تصوروا!

هو بس فيه مشكله رخمه حبتين ولازم حبيبه تعرفها وتعمل احتياطاتها السنه دى:

فى ناس كثير اشتكوا إنهم عمرهم ما داقوا البروفيترول بتاعك يا حبيبه؛ لأن فى

ناس تانيه -برضه عارفين نفسهم على أساس إن اللي على راسه بطحه بيعس

بيها- بتنسف الكميه كلها فور ظهورها!!

كل سنه وإنتم كلکم بخیر وسعاده.

والجميع فى انتظار كرم رمضان

وكرم حبيبه الزائد....

يا سلام بقمه يا بيبه لو تبعتى شوية بروفيتول مع نورا على البيت يوم العزومه؛

علشان ينوبنى من الحب جانب.

Happy Ramadan to all !!!

عمارة نورا ١

لا يجماعه ماتستعجلوش، ما حدش يبارك لنورا، نورا لسه ما اشتترش عماره، ولا أى حد فى العيله اشترى أى عقارات. ما هى العيله دى آه ما شاء الله كلها مهندسين، من أول الباشمهندس الكبير لحد الأنجال - باستثناء العبدہ لله، اللی طول عمرها أدبی- بس ده مش معناه إنهم بینوا لنفسهم أى حاجه -لا سمح إحنا بس بنتعلم الهندسه وندرسها ونتخرج منها وبس لحد كده وكفايه. الله- عندكم مثلاً الباشمهندس عبد الله، اللی إتخرج من سنه ولسه ما فکرش يشتغل مهندس ولا أى حاجه تانيه. عادى خالص.

ولا الباشمهندس على -باعتبار ما سيكون إن شاء الله بعد كام سنه- اللی من ساعة ما دخل هندسه وهو عاملی "ساسبنس" وكل يوم يرجع من الجامعه يقولى إنه عايز يحول من الكليه "الزفت" دى.

أما نورا، فهى كالعاده، ملكة الدراما المنزليه، وقوده يحتذى بها فى التعليم. نورا مبدئياً منذ بداية العام الدراسى السعيد وهى الباص اللی بقیت لازم يفوتها، ولو حصل ولحقته، بيبكون بعد إلحاح وتوسل منى للسواق أصحى من النوم أكلمه يومياً وأترجاه يستناها وأحلفه بالغاليين عنده إنه مايمشيش ويسيبها. طبعاً الراحل ده أنا متصوره إن بقى يجيله رعب وفزع ساعة ما بيشوف تليفونى، ومش عارفه إزاي لحد دلوقتى ماعمليش بلوك وريح دماغه من الأم الرزله دى!

الحكاية بدأت لما نورا قررت تدخل عماره، لأومش فى أى حتته، لأهى دائماً محده، عماره فى الجامعه الألمانية. أنا فى الجمل ضد الجامعات الخاصه، لكن تجربه التسجيل والقبول فى الجامعة دى بالذات كرهتنى فى الجامعات كلها، والتعليم نفسه، كمية غباء إدارى و تخلف عقلى، ولا أعرق الجامعات الحكوميه اللى أنا متعوده عليها.

المهم، الحمد لله، البنت اتقبلت فى عماره بعد اختبارات عويصه ودروس خصوصيه استغرقت الصيف كله، ودمرت الأجازة اللى كان مفروض نرتاح فيها بعد الثانويه العامه.

الحمد لله، أنا إتنفست "الصعداء" زى ما بيقولوا وقلت خلاص، المشاكل خلصت والباقي بقة دراسه عادى، يعنى زى كل الجامعات، لكن للأسف، خابت جميع توقعاتى.

حياتنا جميعاً كأسره مصريه معذبه "إنقلبت رأساً على عقب" بسبب عمارة المهندسه نورا. إزاي؟

بكره إن شاء الله أحكيلكم، عشان لازم دلوقتى ألحق أكلم السواق المسكين وأصحى نورا اللى مطبقه بقالها يومين على سجادة الصالون.

عمارة نورا [2]

وصلتني أسئلة كثيرة عن التغييرات التي حصلت لنورا من ساعة ما دخلت عماره، والناس عندها فضول تعرف مين بقه اللي حياته انقلبت رأسًا على عقب معاها وازاي؟

أولاً: طبعاً نورا نفسها تحولت في خلال تيرم دراسي واحد من بنت أمره بتتنزل متشيكه وعلى سنجة عشره، إلى زومبي إسود محروق، بينزل الجامعه بالبيجاما اللي كان نايم بيها طول الليل. طبعاً إتحرقت من كتر الرحلات اللي بيعملوهاهم في سقارة ومصر القديمه ويسيبوهم مرزوعين في الشمس بالساعات عشان يرسموا، ومن المشاوير من مبنى للتاني جوه الجامعه مترامية الأطراف.

نورا طبعاً بطلت تنام، لأنها ما بتلحقش تخلص اللي وراها في ميعاده، وده راجع لإن الجامعه الحقيقه منظمه جداً، وممكن تبعت لهم "سينمنتس" الساعه اتنين بالليل وبقى ميعاد تسليمه الصبح الساعه ثمانية. عادى جداً.

أما بقى في الأيام المفترجه، اللي مافيهاش ضغط شغل جامد وممكن تنام، هي مش بتبقى نايمه في السرير عادى زى الناس، لأ طبعاً، حاشا وكلا وألف لا، هي لا مؤاخذه بتبقى مكفيه على وشها على سجادة الصالون، اللي إتحول بقدرة قادر إلى استوديو، ودائماً بتروح في النوم أول ما تبدأ أى رسمه أو مشروع من بتوعها، وتتقلب فوقه بدل ما تخلصه وتسلمه الصبح.

ثانيًا: أنا طبعًا من الأشقياء اللى تحولت حياتهم بحيم بسبب العمارة، باعتبارى أم مشروع المعماريه العظيمه، ولازم ينوبنى من الحب جانب. أنا طبعًا مطلوب منى أصحيتها من الغيبويه عشان تلحق الأتوبيس وإلا هاضطر أوصلها، ومطلوب إينى أحاول أفوقها، ده لو أصلاً عرفت أصحيتها، عشان تحضر وتفهم المحاضرات و"التوتورالز" بتاعتها.

أول ماترجعلنا بالسلامه من الجامعه، محمله باللوحات والمساطر والصناديق، البيت كله يبدأ مرحلة الإعداد لليله طويله، وما تستلزمه من مشتروات من المكتبه. وهنا بقه بنعمل قرعه، مين اللى هاينزل يدور على لبن العصفور من سمير وعلى والمعارجى وألوان. إحنا بقينا زباين مستديمين فى كل المكتبات دى، وبدأنا نتعرف على أهالى بقية الطلبة المساكين إالى دايجن ورا ولادهم زينا. وعلى فكره، بجد ده روتين يومى، كل يوم فى حاجات جديده بتتطلب من أول الأقلام العجيه والأدوات الهندسيه، لأنواع نادره من الأوراق وفصائل منقرضه من الألوان والفرش والمقصات والذى منه. أنا هنا ماقدرش أنكر فضل على، اللى ساعات يسبب اللى وراه وينزل مكفهر يجيب لها الطلبات، وعبد الله برضه بيعمل اللازم أحيانًا. هما الصراحه كثير بينقذونى، بس ساعات يستندلوا وأنا أضطر "صاغرة" ورغم أنفى " أنزل أجيب الحاجات. برضه لازم أذكر بالخير البواب وأنجاله، اللى بيروحوا عند الموان ويجيبوا جبس وأسمنت ورمل لزوم الشغل والعماراه... عمارة نورا.

أما بقه الباشمهندس الكبير، أبو المهندسين، فده خلوه على جنب، هو المستشار الخاص بتاع المعماريه المفعوصه، وبستغله أسوأ استغلال زى ماهى عامله فينا كلنا. يعنى بيجروتها تخليه يقعد جنبها ويعملها "هاتشينج". تخيلوا مهندس استشارى كبير فى خبرته وسلطته يساعد المعماريه المفعوصه، أو يلف على المكتبات يجييلها "سابليز"! إيه الجروت ده؟

قال وبعد كل ده تخلفلى كل يوم وتقولى "أكسم" بالله أنا هاسقط التيرم ده". آه والله، دى مش غلطه مطيعه، هو ده "الكسم" المقدس بتاع بنات عماره. أنا كل ما اسمع القسم ده بطنى توجعنى وأقول . فى سرى طبعا لحسن نورا تسمع-: ولا يوم من أيام ألسن وآداب وتجاره.

يلا بقى ندعى رينا للبنوتات الحلوات بتوع عماره زى نورا وهايدي، إن رينا ينجحهم ويقويهم على العماره ويخلصوها على خير، ويخلصونا منها. قولوا آمين

oboiikan.com

عمارة نورا (3)

النهارده يوم جديد. الحمد لله، نخطينا مرحله الورق والفوم والقص واللزق والألوان، ودخلنا مرحله جديده.

النهارده هنشتغل بقه شغل "بروفيشنال" شويه، وهنبداً مرحله الجبس وما أدراك ما الجبس!!!

تعالوا معايا أوصيف لكم الموقع:
حمام بيتنا الصغير.

بعد مداولات عائلية مطوله، استقر رأى الأغلبيه على إننا نصب الصبه فى الحمام.

ماهو مش معقول هنجيب جيبس وميه ونقعد نلغوص فى الصالون.
وبرضه السفره مش فاضيه، عليها أوراق ورسومات وبلاوى.

فرشنا أرض الحمام كلها جرايد، وحضرنا القصعه- قصدى الطبق الكبير اللى هانعجن فيه- وقعدنا أنا ونونى على الأرض.

لبسنا "جلوفز"

لزوم الشغل، واستعنا بالله على الشقا.

الكلام ده كان الساعه تمانيه مثلاً.

بدأنا نخط ميه على الجيبس ونقلب.

شويه والمعلقه اللي بنقلب بيها اتحجرت، ومارضيتش تترجح من مكانها في نص الطبق.

مش مهم.. إيه يعنى معلقه وطبق وشويه جبس وهدومنا باظو؟! ولا أى حاجه....

سبت نورا رهينه في الحمام؛ لأنها لو اتحركت بجبسها هتدمرلنا البيت كله ورحت أجيب طبق ومعلقه تانيين. وبدأنا الجوله التانيه.

طبعا أنا ماسبقليش الشغل في البناء، ومعلوماتي عن الجبس منعدمه وهي كمان.

الجامعه بتاعتنا مالهاش دعوه، ولا حد قالها عن مقدار الجبس والميه وأدينا بناخد خبره.

نزود جبس يطلع تخين، نزود ميه يطلع سائل، نزود جبس تاني يعمل كلاكيع، وهكذا دواليك، لحد الساعة ما بقت ١١

الموديل لازم يتسلم الصبح مصبوب وناشف.

وهي مختاره موديل معقد وكله تفاصيل عشان تبقى "مور كريتييف دان اذر ستودينتس".

وأنا نفسي أقوم أرمى الجبس في الزباله واخليها تسبب الجامعه خالص. بلاها جامعه.

والتعليم اللي يبهدلنا كده مالوش لازمه.

على المغوار، الله يكرمه أنقذ نورا بعد ما أنا بعته.

عملوا حبس جديد بدون كلاكيع، وبدأت مرحلة الصب.
دهنا الموديل فازلين وجلسرين وبِسْمِ الله.
الموديل أول ما مسكته الحبس اثمار واتفكك ٦٠٠ حته، ولولا إن نوني ناصحه
وعامله موديل احتياطي، كانت بقت ليله هباب.
على ماجبنا الموديل الثاني، كان الحبس اتحمد وضحينا بطبق جديد وبدأنا تاني.
الحمد لله.
الموديل المره دى استحمل.
وسييناه على أرض الحمام ينشف.
الصبح وهى بتاخده كانت طايره من الفرجه.
حطيناه فى صندوق محكم؛ عشان تشيله على قلبها وتوريه ل T A وتاخذ
الدرجه.
يا فرجه ما تمت!
فى الجامعه بتطلعه من الصندوق
لاقتة فرافيت.
سابته ونزلت تعيط على الأرض
جنب هايدى وبقية الدفعه اللى موديلاتهم اثمارت زيبا.
أنا بقه عرفت وحلفت إني مش منصفه الحمام اللى لِسَّه بجبسه وجرانينه وفازلينه
لحد اللحظه دى.
كفايه عماره بقى... حرام عليكو.

obseikan.com

سفر سفر سفر

سفر سفر سفر..

قلبي بيوجعني من السفر.

مع كل تفصيله في السفر في حاجه جوايه بتوجع.

جزء صغير بيتكسر.

شوكة بتتغرز وما تطلعش تاني.

مع كل تذكره تتأكد.

مع كل شنطه بتتوضب.

مع كل بوردنج بيتقطع.

مع كل جواز بيتختم.

وكل بوايه بنعديها وتفصلنا عن اللي بيوصلنا.

حاجه صغيره جوا قلبي بتنكمش

وتفضل تنن.

زي بيبي صغير أمه سابته ومش لاقى حد يرهاه.

حتى قبل السفر، جسمي كله بيعبر بطريقته عن القلق.

الصداع يبقى له شكل تاني،

والعضلات المشدوده بتتصلب أكثر

والألم بيتتشر، وحدته بتزيد.

مشواری مع السفر طوییل

زی الألم المزمّن.

زمان وانا صغیره، جدتی كانت دائماً تقولی إنتی هاتسافری کثیر...
والسبب مضحك بجد.

کل ما أقلع شیشی قبل ما اطلع على السریر جنبها علشان تحکیلی
حدوته تلاقی فرده راکبه على التانیه
وده معناه إنی هارکب طیارات کثیر،
ساعتها کنت عایزه أطلع مزیفة طیران، حتی قبل ما أركب طیاره أو أشوف
مطار.

على أساس إن دی أسهل طریقته للسفر،
ساعتها السفر کان أمنیه وحلم
وبعدین التحول لکابوس.
زی مایکون اتکتب علیا طول العمر.

السفر بقى جزء من حیاتی وحیاة کل اللی باحبهم.
وأناعدی خمس سنین، بابا سافر لوحده.
ساعتها کرهت السفر.

بقی زی العدو اللدود.

بعدها بشویه سافرنا معاه.

طول السنه مسافرن، ونرجع فی الصیف علشان نسافر تانى.

كرهت السفر أكرت .

مشاعر موجعه إن طفل يسيب بيته ومدرسته وأصحابه ويسافر بلد غريبه،

وكبرنا، بس برضه السفر لسه بيوجع،

خصوصًا لو حياتك كلها مبنيه على فكرة السفر .

دراسه شغل سياحه .

سفرى .

سفر جوزى .

سفر إبنى .

حتى لما بنسافر كلنا سوا فسحه،

برضه نفس الأعراض بيتيجى .

كله سفر .

كله وجع قلب .

حته منك بتنخلع ويفضل مكانها فاضى

يثن ويوجع ويزن زى وجع الأسنان .

لحد ما اللى سافر يرجع بالسلامه ...

تعريف قصير بالكاتبة / المترجمة

د. عبير مصطفى الجمل، مدرس بقسم اللغات الأجنبية بكلية التربية جامعة المنصورة، درست ودرّست اللغة الإنجليزية وآدابها في كليات الآداب والتربية واللغات والترجمة والعلوم الإنسانية في عدة جامعات بمصر والولايات المتحدة الأمريكية والخليج. حصلت على منحة دراسية لإتمام دراسة الدكتوراه في الولايات المتحدة الأمريكية في جامعة جنوب كارولينا، وقبلها على منحة تابعة لهيئة الفولبرايت للهند في جامعة أوثمانيا. قامت بالتدريس والإشراف على الرسائل العلمية والأعمال الإدارية من وكالة الأقسام ورئاسة كمنترول الامتحانات، والإشراف العام على الأنشطة الثقافية. شاركت في المؤتمرات العلمية بالداخل والخارج، ونشرت عدة أبحاث في مجالات محكمة. لها أيضًا كتب دراسية في الأدب الإنجليزي واللغة والترجمة، تُدرس في أقسام اللغة الإنجليزية والأقسام غير المتخصصة بجامعة المنصورة.

تتمتع اهتمامًا خاصًا بمجالات الترجمة (حاصلة على الدبلومة الاحترافية في الترجمة الأدبية والإعلام من الجامعة الأمريكية) وأدب المرأة، وأدب الأقليات، وعلم النفس والكتابة الإبداعية. نُشرت أعمالها ضمن مجموعة قصصية لكتاب من أرجاء العالم في الولايات المتحدة الأمريكية عام ٢٠١٤ بعنوان: **على عهدة آدم**. لها مقالات وقصص قصيرة منشورة على مواقع أدبية عالمية. أنشأت مدونة

تصدر باللغتين العربية والإنجليزية، ونشرت جريدة الوطن بعض ما جاء في هذه المدونة، صدر الجزء الأول من مدونتها في كتاب بعنوان: أمهات في مهمة صعبة عن دار ليليث للنشر. تعكف حاليًا على ترجمة كتاب عن المسرح للمركز القومي للترجمة، كما تعمل على إنهاء روايتها باللغة الإنجليزية وإعدادها للنشر. تعزز د.عبير بدورها كزوجة وأم، وتعتبر أسرتها مصدر إلهامها الحقيقي.